





97.34733
2741
:19.



菊

潭


集

菊潭集

四

卷

集



菊潭集目錄

四卷

菊潭集目錄

卷一

詩

卷二

駐蹕頌

大元通制序

韻會舉要書考序 張

文忠公歸田類彙序

大都鄉試策問 平章政

事致仕尙公神道碑

忽神公神道碑 大都路

都總管姚公神道碑

參知政事王公神道碑

監末赤公神道碑銘

河南行中書省護軍封南

陽郡公韓公神道碑銘

贈同知陝州飛騎尉追

封洛陽縣男楊君世慶碑銘

卷三

真定路宣聖廟碑

燕居堂銘

安氏尊經堂銘

知許州劉侯民愛碑

鎮平縣尹劉侯遺愛之

銘 增修公廨碑銘 奉元明道宮修建碑銘

重建麻衣子神宇銘

卷四

元史列傳

蘇天爵撰神道碑

虞集撰畫象贊



菊潭集卷一

未

順 陽 亭 尤 魯 翀

范墳詩

宋蜀郡開國公范鎮景仁諡忠文其一世盛德偉烈光
著史籍人固知之其葬在襄城汝安鄉推賢里載東坡
集中甚詳襄城故隸汝州翀來訪問故老其墳儼然故
元詩選在已為野夫豪農耕為禾黍之區矣范氏當金
季猶有居墳左者自經兵燹不知所存拊事歎閔故為
作詩以記其概幸在官君子知其為先賢遺壠庶有以
處之

忠文峨嶠英始也跡甚微堂堂薛簡肅撫隼西南飛其
人古廉守肯持蒟醬肥所得一偉人天下大布衣引以
賓王家光映春宮闈昭陵宋仁主前星久無輝犯諱言

所難雷電每霽威雄哉鍊石手妙補天巍巍丞相江南
 來雲掩扶桑暉舊德陳苦辭往往阨謗譏諸賢抗章疏
 弱卒攻堅圍公力幹禹鼎正氣碎黃扉荆舒憤至骨斥
 文表詩選 語筆自揮贈之以蕙蘭何往無芳菲時公與
 作片誤 司馬聲諧玉琴徽解冠挂神武甘老西山薇九寓日督
 督赤子將疇依兩公幸無恙起拯或庶幾嗣君元祐初
 痛洗前人非民望屬司馬欲遯天為鞶帝命起公臥門
 人文類 車停詩選 駢君實了吾事此外何所希清風溢
 作允 寰海不啻嚴陵磯公既晚家許道德人所睥襄城卜詩選
 下封 兵燼雨雪無留罪公名在天下豈逐薤露晞誰能禁耕
 牧盛事乘新機吾力不足振感歎徒獻欵文類三 詩
 表三十

御宿行 元詩選乙集引菊潭集

蒼茫帝星移紫微露寒金屋人依依夢斷瑤池宴王母
 地上麒麟鞭不走山靈訶護魑魅中何罪取憎逆旅翁
 神龍脫淵命如蟻老嫗眼明龍得水醉轟惡少慰君歸
 歸來宮柳回春熙仲舒三策賤於草明日黃金賜山媪
 閱故唐宮

錦帆一作走滅淮海波虬顛起操湯武戈盪民瘡痍六
 朝下天開百二秦山河我來傍徨舊宮土細麥繇花忽
 誰主終南王氣三百年仙李春風一千古春風吹夢天
 茫茫玉樓金殿春雲香開元舞馬散冥冥紇干凍雀舍
 悲涼世態蒼黃幾煙霧秦漢英靈不知處崑崙河脈自
 西來湘浦雁行今北去

題周公益墨蹟
 今觀益公帖老氣肅鋒銳孫氏青氈永宜開寶墨堂
 題公益答孫魯齋帖

丞相裁詩答布衣殷勤辭翰總珠璣秋風吹落蒼松樹
二百年來此道非

晉祠游詠三首 拂石本

唐叔汾東王祠

掌文握瑞既符天宗子維城足尙賢功在生靈報君父
禮宜尸祝配山川喬雲色映三農壤時雨神通萬斛泉
幸與諸公謁祠下令人長歎鄩桐編


奉酬張僉憲韻

泉流琮琤玉凍香稻陸歷落卦齊疆山頭雲氣能媒雨
木杪風聲凜孕霜神漢有靈凝沆瀣客纓無垢得滄浪
不須對境談今古聊詠新詩送夕陽


聖母祠禱雨

天泓雪霽廕寒松聖母祠前可鑑容水利萬家豐稻晦
山靈千古壯桐封司炎政虐連雲稼使憲清深望雨濃

一灑甘霖徧寰宇泉關噀起抱珠龍



菊潭集卷一



菊潭集卷一

駐驛頌

繼天體道敬文仁武大昭孝皇帝卽位修明世祖皇帝
隆平故事以故東平忠憲王之孫司徒忠簡王之子拜
住丞相中書至治元年詔若曰忠憲弼我世皇功在社
稷德在生民其敕詞臣卽王所有范陽采地朔南康莊
碑之昭示悠久冬刻銘旣完十有二月丞相承詔蒞事
凡犒工勞眾郡邑無所擾饋賀無所受天子遣使牲牢
之饗秬鬯之禋數異禮隆不一而止父老聚觀或至感
泣明年春正月帝幸涿州至碑所重瞳凝竚顧瞻有懷
秋九月幸易州還丙午帳殿碑垣之南駐輦御殿上顧
丞相若曰汝祖考之績之盛世載帝室維朕不忘亦惟
汝之賢有以相朕益懋世德故也丞相頓首謝翌日旣

日太官饌已上步入帳殿御金椅座碑右丞相稱觴獻
萬壽從臣以次進觴天顏和怡甚久迺去丞相諭狎曰
皇上眷我祖考至此不刻以志則未有以稱汝其銘之
狎祇粟奉命用敢敘曰太祖皇帝開創大業忠宣王孔
溫窟哇太師魯國忠武王木華黎佐佑神謨拓定疆宇
繼世國王皆著大功忠憲王繇國王世胄年十有八疑
然以鉅德大人相世廟統六合舉百度底雍熙仁覆天
下以垂大猷以迪來哲皇上念垂統之艱難守成之不
易懷往烈慰股肱聖度淵深非一介臣能窺萬一敢卽
所聞見而獻頌曰
赫赫聖明嗣大寶位祖武斯繩紹我皇制慨想先正孰
佐我家奄奠八紘帝業以華昔我太祖疆理萬國忠宣
忠武功高輔翼雲雨方屯忠武汛埽華夏之民國王蔭
葆巍巍世皇幅幘旣同弼成治隆忠憲之功奕奕忠憲

虎變莫測年未及冠烜著明烈端冕正笏不動色聲儁
傑在職儒碩在廷何昧不昭何墜不舉何絕不紹何遠
不緒三十年間再秉鈞軸天極地蟠孰匪亭毒至元始
終中外人心大耄韶童締慕至今天日清明終古莫晦
柱石廟廊宗社永賴相國今誰忠憲脩嗣民之望之忠
憲是繼克繼克庸滋益光大一以至公熙我天載帝謂
侍臣丞相之賢家世所因其敕詞垣于忠憲勳太侈以
文配永河山以竦見聞涿鹿范陽王有采食山川蒼蒼
北拱帝極蛟螭盤拏大鼉負之德音不廟神呵護之六
龍翱翔馭日霄漢再狩郊垌日此銘篆淵鑑昭回駐驛
永懷廓清煙霾以霽九垓從臣焜煌千乘萬騎能不激
昂以勵忠義世世夔契生此德門君臣道合豈徒示恩
忠憲來雲源源裔裔臣頌此刊不告無旣文表三十八
大元通制序

至治二年冬十有一月皇帝以故丞相東平忠憲王之
孫中書左丞相位右丞相總百官新庶務徵用老成開
明治道皇元聖聖相繼百有餘年宸斷之所予奪廟謨
之所可否禁頑戢暴仁恤黎元綽有成憲然簡書所載
歲益月增散在有司既積既繁莫知所統挾情之吏用
謫行私民恫政蠹臺憲屢言之鼎軸大臣恆患之仁廟
皇帝御極之初中書奏允擇耆舊之賢明練之士時則
若中書右丞伯杭平章政事商議中書劉正等由開創
以來政制法程可著爲令者類集折衷以示所司其宏
綱有三曰制詔曰條格曰斷例經緯乎格例之閒非外
遠職守所急亦彙輯之名曰別類延祐三年夏五月書
成敕樞密御史翰林國史集賢之臣相與正是凡經八
年事未克果今年春正月辛酉上御稷殿丞相援據本
未奏宜如仁廟制制可於是樞密副使完顏納丹侍御

史曹伯啟判宗正府普顏集賢學士欽察翰林直學士
曹元用以二月朔奉旨會集中書平章政事張珪暨議
政元老率其屬眾共審定時上幸柳林之辛巳丞相以
其事奏仍以延祐二年及今所未類者請如故事制若
曰此善令也其行之繇是堂議題其書曰大元通制命
狎序之狎惟聖人之治天下其爲道也動與天準其爲
法也粲如列星使民畏罪遷善而吏不敢舞智御人鞭
笞釜鉞禮樂教化相爲表裏及其至也民協於中刑措
不用二帝三王之盛盡於此矣雖刑罰世輕世重而士
制百姓於刑之中以教祇德古之制也聖朝因事制宜
因時立制時有推遷事有變易謀國之臣斟酌損益以
就中興生民之福也仁廟闢本於先皇上繼志於今萬
世慮也雖然明罰敕法朝廷之道揆在焉惟良折獄哀
敬折獄有司之法守源焉源則濬矣流斯承之可不慎

韻會舉要書考序

文宗皇帝御奎章閣得昭武黃氏韻會舉要寫本至順
二年春敕應奉翰林文字臣余謙校正明年夏上進賜
旌其功余氏今提學江浙以書見質始知其刊正補削
根據不苟序曰惟古大司徒以六藝教萬民次德行賓
賢能禮容樂聲射中御節書文數紀六德六行會焉書
者文也象形用禮之儀諧聲用樂之律指事用射之彀
會意用御之範轉注假借用數之則六書統焉容必由
儀聲必由律中必由彀節必由範紀必由則文斯立而
教斯興焉天子考之以正其偽天下同之以安其情文
斯明而政斯行焉世衰教湮文厯藝舛形體變易音義
阻艱許氏立說而文有類沈約譜聲而韻有書元魏用
翻母而字有攝書家資焉黃氏遡流而源廉取並載得

者便之雖然形體變易若可鑑矣音義阻艱猶或累焉
余氏以文臣奉詔正誤令績也來提舉謀錄其書義舉
也學者得此明其心目仁澤也噫此其編號舉要耳其
傳可盡傳序因是一均可通其餘均序刻本快觀蓋有
待焉元統乙亥冬翰林侍講學士前中奉大夫江浙等
處行中書省參知政事字允魯翀序本書

張文忠公歸田類稟序

聖朝牧菴姚文公以古文雄天下天下英才振奮而宗
之卓然有成如雲莊張公其魁傑也公自弱齡以才行
名縉紳閒仕於朝盡讜言行直道自禮部尚書參議中
書請謁親濟南俄以吏部尚書召親疾終喪省臺奏召
至再至三至五六不起文皇卽位關陝以西兵侵早厲
民孳政荒拜行臺中丞迺起西馳及秦民四流亡耄穉
子遺若鼎魚箴蟻天毒方熾湯沸泉溢吏士猖蹶目瞠

神駭莫克拯拔公懇悃率倡務用仁術官帑不繼傾已
囊橐日不勝給每每大慟民僅蘇復公疾薨天子聞之
惻然閔悼贈攄誠宣惠功臣陝西等處行中書省平章
政事柱國追封濱國公諡文忠中外嗟惜無何翀使憲
陝西士民談道琅琅耿耿未始不悽愴以聽之秦人悲
思樹石刊銘不忘公質厚剛毅正大明白仁於家忠於
上確信不渝已善不伐人之善推獎若不及其文淵奧
昭朗豪宕安帖其動盪也雲霧晦冥霆砰電激其靜止
也風熙日舒川嶽融峙綽有姿容闢翕頓挫辭必已出
讀之令人想像其平生千載而下凜有生氣不可磨滅
斯足尚矣公素知翀其子引偕其婦翁吳肅彥清持公
所輯歸田類彙三十八卷徵序因書其概如此公諱養
浩字希孟雲莊其自號也行業履歷家乘國史有載茲
不容贅元統三年龍集乙亥二月甲寅朔中奉大夫江

澗等處行中書省參知政事字允魯翀序文表三十一歲日精廬藏

大都鄉試策問無具類類軒轅太妹賦其間香土不
朝廷者綱紀所綜而風化所由宣京師者郡縣所望而
民物所由阜以上達下者禮樂政刑也事孰大焉以下
奉上者士農工商也業孰廣焉事振於上萬方治象以
之昭明業修於下萬世邦本於是鞏固生民以來天下
國家莫之能易也夫禮天地之節也三代損益雖可槩
見叔孫之儀後世因之開元之禮通典識之宋金雖未
定其書禮之記錄者國有大議廟堂諏詢宸宇斷制必
采而用之其於事天享帝之為敬君臣父子夫婦之為
綱孝友睦婣任卹之為教果盡古昔之道適時措之宜
乎樂天地之和也誓宗制氏失傳雅益趨俗近古有為
之君知方之士思復古制而竟未能一其或有作不能

無憾沿襲至今署兩大樂律呂果昭合乎治忽果關繫乎政以德德本於天法制禁令政之條目也施無所本足以帥其下乎刑弼教教宗於禮鈇鉞鞭扑刑之不得已也用無所宗足以戢其亂乎民於下者士也農也工也商也士俊造之藪也將相百執事之階也今養士法加詳取士路加闢而士習益陋士氣益卑豈學非所用用非所學乎其何道以礪之農衣食之原也上有司農之政下有勸農之臣墾令雖嚴而汙萊閒於圻甸古籍可考而游惰萃於都城況其遠者乎其何法以治之工利器之府也奇功熾而奪稼穡之務苦窳售而耗庫廩之儲其何方以正之商懋遷之資也鈔法久墮農末交病市擾不測有無俱艱傲倖者公私相欺折閱者上下莫愬其何術以平之聖天子踐阼科舉舊章再布明詔京府開試光被德音諸君子需貢輦下經濟首有望焉

之八者本末精麤討論有素請著於說

文類四十八

平章政事致仕尙公神道碑

大德八年春三月己巳中書左丞尙公請老上不允若曰其服朕命毋怠冬十月稱疾力請予告九年春還保定時年六十有九明年夏六月拜昭文館大學士資德大夫中書右丞商議中書省事召不起武宗卽位加榮祿大夫預司農司事中書職仍舊召秋九月覲龍虎臺大臣莫不譽公上悅若曰眾以卿宣力我家爭譽其賢故耳公再拜稱觴上萬歲壽御璫賜之酒故事酒答臣下璫人授之不親賜也時特授公左右相目嗟異冬十有一月東宮賜宴翰林俄以疾還至大二年春正月使召辭三年冬十月贈魯三代仁皇出震召問大計稱旨賜宴清勝園皇太后賜宴南園夏五月丐去陛辭上御武帳問之以氣暄室隘敕近臣出諭若曰卿來盡心獻

納朕未始不從稱老懷歸豈遽忘國家耶凡益國便民其以疏聞當行朕卽行之敕宰相李道復等進秩慰餞遂加銀青職仍舊賜白金百兩金綺二匹宴中書驛送還歸時年七十有五延祐五年制贈曾祖考仲資善大夫翰林學士上護軍追封上黨郡公妣魏氏郡夫人祖考安榮祿大夫大司農柱國祁國公妣王氏國夫人考汝楫銀青榮祿大夫大司徒上柱國祁國公妣李妻魏皆國夫人六年春正月拜太子詹事使三往迺起三月辛酉見上嘉禧殿之後閣上顧太保曲出目公曰是自世祖皇帝效力潔淨人也徐曰周卿汝前汝知古今識道理練大務太子託汝善輔之有言勿吝善教之此朕意也公見皇太子首以念祖宗孝兩宮養德性辨邪正陳之太子異其言夏五月北幸觀花園北行殿上若曰朕不文直諭汝勿惜盡言教太子賜尙醞馬酒各一罌

詹事俸入不受俄謝歸年八十有二泰定三年以中書平章政事致事制授於其家賜楮泉萬緡綺帛四端尙酒二尊公表謝復賜酒時年九十有一朝廷尊賢養老思輔長治其見於公如此四年十月八日薨享年九十有二計聞制贈推誠佐治寅亮功臣金紫光祿大夫大司徒上柱國追封齊國公諡正獻公諱文字周卿祁州深澤人幼嗜學甫踰冠卓邁有聞世皇御極急務求賢三大臣體上意銳采擇中統元年張忠宣公文謙宣撫河東還故參知政事王椅薦公忠宣奇之辟掌書記至元元年辟西夏行中書書表二年始立朝儀詔魁賢鉅德者討論詳定太保劉文貞公秉忠薦公參預凡常朝朔望起居元日冬至會覲再拜內外文武仗衛布置服色差等圖象規製皆公掌之節次入奏清問所及必公條對明白久之聖鑑通明敕結綵畫位皇城之東百官

肄習上御法座臨之見大書宸極御座之居上召公問
之對天極居中眾星環共帝德無爲天下歸之其象類
此上悅習已大悅遂爲定制播告天下七年敕知事大
農八年轉大農都事禮成置侍儀司太保以公見上仁
智殿擢右直侍儀使十有二年復都事大農其佐農政
也置七道巡行勸農事聯保五課耕桑修水利立社學
築義倉革浮薄禁游惰多自公畫十有七年出守輝州
不事刑撻因其土俗以禮導之令行禁止河朔大旱禱
輒雨歲大熟踰境旱自若也聞者異之懷孟馬氏宋氏
被誣殺人訟蔓不決提刑部使檄公讞之推跡究情得
尉吏文類作史獄卒鍊喉狀兩獄皆雪牧輝二年民安事治
十九年冬召拜戶部司金郎中初竹稅置提舉隸省部
懷衛居民犯一筍一竹率以私論至破家至是抗言罷
之課入郡邑害遂弭明年秋使山東定征稅度風土市

慶立中制江西省憲交訟裕皇令中書公奉教訊詰罷
省臣宣慰臣各一追白金千二百兩二十一年冬改戶
部郎中明年春都事御史臺會聚斂臣答卽歸阿散等
謂海內財穀省院臺內外監守里魁什長率有欺蠹請
大蒐抉上允敕眾勿沮利黨嘯結兇壬擬使旁午省臣
御史掾吏民庶罹穿陷日眾人情危駭先此南臺御史
封章言帝春秋高宜禪位於皇太子皇后不宜預外事
太子聞之懼公因祕之以杜讒隙此曹覘之鉗臺史督
索公白中書右丞相安童御史大夫月律魯拒之越翌
日其黨以聞敕大宗正薛尺珩取其章太子益懼二相
憂變不測公思用拯之方閱舊案得兇黨罪玷數十白
大夫曰事急矣請就省圖之至遂說曰丞相大夫以勳
貴忠賢荷天寵柱石廊廟皇太子天下本固本安天下
兩公任也此輩傾險乘釁奮不逞祕章出禍可言邪今

先計奪謀使噤不容喙策之上也二相曰善入言狀上怒若曰汝等無罪耶震厲未止丞相前曰臣等有罪不辭但此黨名載刑書類非慎潔動必驚害生靈宜選重臣使為之長庶靖紛擾上徐霽威可其奏三相出宣制緩其行兇爛為沮俄而告賊賂者喧集事聞天威大震或誅或竄或奴時漢人臺臣皆闕公位幕佐以智勇忠義動大臣悟明主殲大熟銷大釁旬日之間中外清泰聞者壯之俄丞大農治京兆屯田畎澮汎溢不蓄二十四年置尙書省柄臣頡政急賦讒戮大臣眾股栗使者四出峻繩督務贏官緡徽賞悅公使燕南得鈔緡約四十萬與民者三之二賞雖不及功亦見時至元鈔始行置寶鈔提舉司隸都省金與銀禁私易小人挾威張罟獲飽饕餮摧破民產動再年使江西治其敝吏行詐舞文各以罪論或誣熊氏子買藏金尺吏訊則無之訊益

酷乞輸直不聽聚貸簪珥作新尺符其妄迺已劉氏子誣其弟貸利潛易金銀獄久不絕事皆類此公至率清脫民始^①息其年理鹽若雜稅江右明年升少卿理獄理賦山之東署置濫溢汰之政令苛虐蠲之事理欺惑正之尙書省罷政歸中書^②明刻文類空五格有月字二今據元本補文表全脫十有八年夏四月遷吏部侍郎考覈尙書省臣鈐綜所不當最簿上之流品清別井井不紊始以肅政廉訪司憲諸道明年公使憲湖北初提刑按察之憲鄂也行省奏罷其司聽攝山南者再事滯民疾公曰此憎忌者閒之耳凡政刑大務即省議之慶祝大禮赴省行之糾按貪墨不少貸讒格政行民始受賜三十一年秋召為刑部尙書公以遠近稟決刑制不一吏誕民瘼請依古律令采寬厚新憲意以一吏治不報成宗元貞元年春拜侍御史會江浙省平章用虐行悖行臺御史浙西憲人

條狀彈劾制遣公洎大都護往詰之左驗明著平章者挾貴驚岸不臣公等以聞平章者以國制軍數禁密無敢或預御史嘗取數鎮兵於是籍其故擅驛走都以相噬昨都省奏不用臺臣特以都護按問制可御史偏威卽承兩造具備敕省臺太師宣政等眾大臣雜議率阿勢貴犯輕宜宥御史法當死公曰不然御史職號監察今所繫者上欺下暴制使馳訊拒捍無禮罪重不輕必以軍數有禁言之小吏佐書掌給鹽米甲簿伍簿數誰不知況御史因兵卒交愬責令長帥均役情無害法縱有罪亦輕不重皇上御大寶赦天下德洽民心豈宜濫刑以累聖治議都堂三辨巖廊再眾列奏公廷爭剴切上開悟平章御史各杖遣眾呼萬歲他日集肅政堂眾憂省臺不協公曰天下無難事第恐處之失其要耳都省長百司丞相握大柄相抗不敵動瀆天聽取厭傷體

自今而後狼貪虎暴者抨彈之事不涉私者正救之果大鉏鋤論斥未晚何用紛紛眾臆公言未久猜釋風紀肅然二年請無數赦罷役不急上嘉納大德元年夏河決蒲口冬公使憲河南明年春偕敕使相決河籌久利公建言長河萬里湍猛東注下盟津地平土疏蕩徒不常失禹故蹟文類作疏流患中土不知幾何千年孰保無患治得其當則民省而患遲失之則力費而患速此定論也今陳留抵東西百有餘里南岸故河口十一已塞者二自澗者六通水者三岸高水六七尺或四五尺岸北故隄水高北田三四尺或高下等大較南高於北約八九尺隄安得不破水安得不北也蒲口今決千有餘步迅快東行得河舊瀆行二百里至歸德橫隄之下復會正流或疆湮遏上決下潰終竟無成揆今之計河北郡縣順水之性遠築長隄以禦汎濫歸德徐邳聽民避衝

潰圖文類作擇所安嬰患戶齒河南淤田量給永業他決視此卽救患之良策也蒲口不塞便策上廷論從之河朔郡縣山東憲部爭言果然則河北桑田盡化魚鼈之區矣塞之便復之明年蒲口復決障塞之役無歲無之是後水北入巴河復故道竟如公言三年秋憲山東宣慰使挾壻宗室以浮論懲叛謂治淄青政宜猛故藉是久居方闔外掠譽而內貪虐憲糾小有違言吠啞卽至公度難力爭使者往來公以溫言順附而嚴礪之彼乃感服其下稔惡會有告者選官按詰得二十餘人決杖追賊以慰惇弱遂大慚謝逐所親暱用事十餘輩歸民田二百餘頃四年秋授中奉大夫參知政事行省江西既莅政以吏選淆濁凡庠序之師軍民之佐財穀之主典隨事立法員數百浹日皆注無復容私眾始睚眦終莫奪俄趣公分鎮嶺文類作雲南快私憤公曰此軍政也非制

敕不敢行驛使頡稟得報蒙古平章偕公在省餘以次出鎮眾計沮事聽公決摧彊生枯濯癘疏壅省務清簡六年秋移疾北還冬十月拜江南行御史臺中丞辭明年召至京師拜資善大夫中書左丞時朱張氏得罪省臣率譴逐唯左丞相兩新平章洎公凡四人調變政務浙西水沴民饑山東歲兇盜充獄公議發官廩周罄乏縮湧價舒市易泄富足通閉遏責兼并仁客佃民能施米上三百石爵有差得米石五十萬救吳越餓殍為蘇出官緡八百五十餘萬卹齊魯敝癯亦息選清望臣使十道宣撫天下采利病得失黜貪暴安善良江南官民田賦均減三之一南方學浮圖氏號白雲宗者髮而妻子田宅誑愚民託祝釐道徭賦倖習甘賄奏為總攝錫印章郡縣酋豪名署七千餘所眾數十萬於是罷之斥散黨與同民賦役時順德忠獻王答刺罕與君同心輔

政選庶官齊百度罷斜封汰冗員絕寶貨約濫支節淫
費量入制出擇民牧屏世守定賊律除虐禁明婚制阜
民生綱正目舉有中統至元之風公粹美高亮行修潔
年十六七志學溯伊洛究洙泗完經大史諸子百家該
洽無不綜一以仁義爲根極孝友行業著見州閭大臣
交薦聲名日振世廟方大有爲衣冠元老森然以所能
輔經緯公翱翔上下畫佐闕先實與有力歷事五朝才
識弘經濟功名映寰海德望尊廟堂忠信締淵穆懸車
私第嗣聖繼明眷注益渥使車累召進必勇退從容事
外二十餘年壽考康疆几杖清寂手不釋卷摺紳造之
非聖賢中道經綸大經置不談聞者隨其器量大小皆
潤溉天下望之若瑞星神岳素纈嚴繇飲食動靜皆有
節制居位應務察事理守名法簡易正大物無不容推
行所宜不膠不固大政大節利不回威不屈仁勇沛然

綽有餘裕古遺愛遺直公盡兼之於戲世皇長駕闢馭
網羅英才培植之久大德卿相稱賢無右公者養賢資
世豈易言哉公娶某氏子男某某孫男某某年月日葬
完州某鄉某原公弟之子曹州判官克和以國子助教
張執中所狀公行遂以銘託烏乎公往矣文行事功百
世師也其敢以昧陋讓銘曰
皇元統天大定于一聖聖明明崇建皇極三光五岳氣
象渾同天產人瑞以彌帝功瞻彼恆山峩峩大茂挺生
尙公神峰綜秀始遇世皇邁績華勳禮樂稽古稼穡養
民鴻臚大農事係賢哲左右後先夷夔稷禹朱旛五馬
衛源之澠里詠塗歌神明父母孰驚皇靈七鬯震搖用
輔執法正色立朝孰斲民力烈火凝霜用使四方雨澤
春陽孰蹤陸梁摧我獬廌用立憲紀鋒稜益大孰徇貪
蠹棍彼鴻鈞用握政柄化育載新年鄰七袞勇於告老

天制臣義豈曰太早昔也廟朝淵淵兩軒后之鑑神
 禹之鼎今也鄉社于于雍雍天下之表人中之龍有謁
 其庭鄙吝清滌齒頰餘論皆世藥石道德之容禮樂之
 度大醉而醒孰寐斯悟善數數之侯卿侯公百歲完潔
 其誰擬隆有德有文有位有壽功在史牒名垂宇宙太
 行嶙嶙淳易法刻此銘詩相配無垠文類六十八
表二十九
 大元故鎮國上將軍河南淮北蒙古軍都萬戶府副都
 萬戶贈輔國上將軍樞密副使護軍追封雲中郡公
 諡襄懋忽神公神道碑銘并序
 公姓忽神氏諱伯里閣不花其先蒙古部人高祖博魯
 温諾延佐太祖聖武皇帝勦業有大功子孫遂以弓矢
 韃服侍御乘輿長宿衛其職曰火而赤曾祖考塔察而
 一名倭蓋以弓矢侍御太祖天兵克燕趙命為燕南斷
 事長官歲壬辰太祖皇帝伐金拜行省兵馬都元帥將

所分衛士及諸王駙馬蒙古諸□□自河中府渡河
 破潼關取陝州癸巳春正月朔旦降陝帥趙行省東行
 降洛帥馬行省並河玳□寨□任元帥民豪蘇沐王居
 賈珍閻海支顯等以次納款皆使按堵以集民眾以所
 得兵士益部曲攻金主棄汴沙河走歸德遂之蔡秋
 偕大兵襲蔡築壘示持久遣使于宋徵兵口金人危蹙
 冬破蔡西城元帥犯矢石先登按兵緩進欲生致金主
 俄鼓譟囚合金主自縊幽蘭軒甲午春正月金亡元帥
 奏金人既滅宋或迫我何以隄禦請互大河南北東自
 曹濮西抵秦隴分兵駐守鎮中原遏宋寇制允由是京
 兆鳳翔秦鞏等二十四州迤邐撫定乙未秋宋人寇淮
 元帥將眾南征丙申春二月息州主帥崔太尉□□降
 光息口地皆定詔以息民及瑋瑁寨戶口賜元帥農田
 養老戊戌攻壽州薨于軍祖考別里虎台繼佩弓矢事

憲宗皇帝襲長部伍壬子秋七月授行省兵馬都元帥
印將領四萬戶蒙古軍馬并諸翼漢軍征收淮漢未附
郡縣薨考密里察而事世祖皇帝繼佩弓矢中統元年
授大河以南統軍五年授保甲于壯射生軍達魯花赤
至元四年襲蒙古軍萬戶口襄樊薨泰定元年贈明威
將軍洪澤屯田萬戶府達魯花赤上騎都尉追封平陽
郡侯妻博羅海平陽郡夫人公叔父宋都台襲攻襄樊
十年呂文煥降十一年從大兵收鄂岳授昭毅口將軍
收歸峽下江陵以兵鎮潭州十二年兵攻江州授都元
帥佩虎符兼江東西大都督破建昌州獲斬萬將軍撫
輯民庶七千餘戶次塔水擒驍將熊飛并偏校五十餘
人抵龍興主帥劉運使率眾降綏輯士民秋毫無犯南
康吉巖袁瑞臨撫建廣南東西道次第皆降十三年冬
十月薨公之兄阿魯灰襲將元軍戰克有功十八年授

江西道都元帥薨十九年公始襲父兄舊職嗣獠董輝
等叛討平之授昭勇大將軍蒙古軍萬戶佩以三珠虎
符三十年以蒙古軍戍湖廣從平章政事劉二霸都討
叛寇所至益戢元貞元年將蒙古兵二千人扈從上都
秋八月加鎮國上將軍職仍舊賜口口帶弓刀鞍轡歲
扈北幸大德三年從武宗皇帝北征著勞績詔以所部
兵屯田稱海六年授河南准北蒙古軍都萬戶府副都
萬戶仍屯田九年益以北方益晏詔有司資力還河南歲
扈乘輿上京延祐元年秋八月一日薨葬平陽解州聞
喜晉原鄉甘泉鎮西原之塋泰定元年贈輔國上將軍
樞密副使護軍追封雲中郡公諡襄懋夫人諱完者姓
劄刺爾氏封平陽郡太夫人子男三人長昔里伯吉次
昔里吉次嵩壽昔里伯吉延祐二年夏四月襲明威將
軍佩三珠虎符河南准北蒙古軍都萬戶府副都萬戶

四年秋九月特加懷遠大將軍泰定二年秋八月進定
遠大將軍今至元再元之二年夏五月進昭毅大將軍
性簡重明亮善撫士卒四府兩翼將吏畏其威而服其
德可謂能子而賢於其家者也夫人寶口封平陽郡
夫人蓋嘗論之帝天下之興也必有絕世之才同德之
佐翼世運隆丕基尚矣皇天眷祐太祖皇帝受命而出
襄懋公之高曾英邁材武感會風雲開闢疆宇爲佐命
元功口及公之祖考父兄繼兵師效忠力光振世業六
世八傳皆有令聞河山帶礪詒慶無疆邇其所自來干
戈熾燄玉石不分之際智勇仁義德及民物信可見矣
是宜銘銘曰

龍燭玄漠篤生聖人柱天維地弘濟生民天威所臨萬
里影響雷厲颯馳乾坤運掌孰順羽翼孰雄爪牙輔之
口之開國承家襄懋之先擁護聖武以開皇圖以定方
寓英賢世出佐我祖宗金宋繼墟六合混同世握兵麾
高牙大纛六葉七襲而至襄懋至元之盛大奠南服猶
有頑獠虐熾炎毒桓桓襄懋襲烈父兄風埽口汎以暢
皇靈虎節鯨珠照耀行伍遂從吉巡灤闕清暑大德之
始遐朔未靈武廟龍潛天俾其行詢用襄懋練簡部曲
從我撫軍以壯師律屯戍和林饋餉以豐副帥河南口
表世功武皇御天中外靈登整肅口旅春秋扈蹕從容
治世享壽天年之子之承克象其賢封諡褒崇請自天
錫使亞樞府口數赫奕桐宮之鄉實維晉原松柏蒼蒼
爲公之阡河東之居口雲世守刻口穹碑照于悠久
至正五年歲次乙酉十一月戊子日拓本

大都路都總管姚公神道碑

公姓姚氏諱天福字君祥拜監察御史彈擊權臣無所
顧畏世祖皇帝賜名巴而思國言虎也其係出唐賢相

文獻公元崇文獻諸孫伯祿卒絳州觀察判官葬絳之
稷山縣南陽里繇是世為平陽絳人公考處士君諱君
實字仲華甫冠辟兵雁門金進士趙泰以子妻之生公
及和眾主簿天祿公姿白皙美風矩童卯不凡聞處士
訓忠孝奉受惟謹從事郡府挺潔不羣儕輩畏之仕懷
仁為縣史世皇以太弟駐白登公縣進蒲萄酒見奇之
留侍宿衛至元初丞縣懷仁大帥楊闊闊出薦其能於
丞相塔察兒丞相奉使朔漠修睦宗藩引與之偕五年
立御史臺丞相為大夫奏授架閣管句秩將仕郎十一
年以承事郎拜御史十三年江南平冬十二月宰相銜
怒左遷同知衡州路明年春三月以朝列大夫改河東
山西道提刑按察副使佩金符夏六月拜治書侍御史
秩中順十六年春使憲淮西北道秩嘉議十八年憲
江南湖北二十年夏憲遼東明年春以母老請歸養不

允二十二年春召為刑部尚書秩通議逾年總管揚州
不赴二十六年夏復憲淮西秩正議三十年拜中奉大
夫甘肅等處行中書省參知政事以親辭改肅政廉訪
司成宗即位使肅政廉訪於陝西元貞元年春三月遷
真定總管冬丁太夫人憂自雁門徙處士君柩合葬絳
之稷山中書起公還真定大德三年春二月拜江西行
中書參知政事辭奉使山東還四年秋七月以通奉大
夫參知政事行大都路都總管兼大興府尹本路諸軍
輿魯總管管內勸農事六年春正月二十有八日薨於
位年七十有三公至元名臣勳德焯著其薨也朝廷悼
惜吏士護喪歸平陽以夏四月某日葬稷山西北嘉禾
里泰定三年以子侃請制贈正奉大夫河南江北行中
書參知政事護軍追封平陽郡公諡忠肅天曆己巳侃
以公行實徵銘神道之碑不護終辭因采其本末而次

第之公始爲御史條奏宰相阿合馬罪二十有四召廷
辯公枚數其罪彼輒引服數至於三氣沮情賊上動色
若曰此三者罪已不宥曰公曰巴而思臣下有違太祖
之制干朕之紀者汝抨擊勿隱廷臣震竦今祕世未有
聞時方倚相理財姑釋不問眾亦爲公危之太夫人趙
君有賢識勸公曰國爾忘家汝第盡力果不測吾追蹤
陵母死日猶生年公泣謝曰其長曰萬一得譴乞不以
老母坐連也語聞上歎曰是母子有古義烈敕侍臣董
文忠宣付史臣書之監大名小敢普得罪御史按之至
見毆辱繼用公往聞道微服入境察悉其情還取驛抵
其所撻挾如神簿責死罪十有七械送輦下俄以宥貫
經臺門大詬公在察院促捕之目檢行橐得賂侍御史
安兀失納救免狀卽桎敢普而祕其事夜用巡符託詞
邏奄至一道士室盡獲其賂明日陞奏上曰彼七死猶

赦汝欲何爲公對罪十有七赦七留十餘誰任咎上悟
戮敢普斥安時御史大夫二安善甚一旣斥與所善猶
雙陸禁中公曰安庶人耳豈得與大臣狎叱令起座皆
失色公卽入奏一蛇九尾首動尾隨兩其首行不能寸
今憲不網蛇首二也上曰然一人二冠可乎召兩大夫
諭以公言大夫孛羅懼以年少自劾罷有讒提刑按察
之不便者有旨罷之是時廣平貞憲王月呂魯爲御史
大夫公告之曰往者悖叛蝟起郭塞見聞今列憲宇內
廣視聽虞非常慮至深遠不但繩督有司而已也縷縷
陳之大夫悟矍然曰幾失是夜造禁密詳奏上曰此天
下安危計也其勿罷會駕北幸所擊相馳騎公閱其家
脫粟數斛外得言事故橐羅織苛毒公亢聲曰乘輿行
狩戕害言官倣宰相盜欲反邪拮拾無所得斥遷衡
州俄憲河東太原民飢開廩振卹議者以擅罪公上知

不私置勿問朔方兵興役民轉粟人畜顛踣公曰執政非策自蹙其本也投闕論奏改和糴疲瘵爲蘇留遷治書出憲淮西先是蕲黃有叛者將吏臧獲良民以萬數公皆理歸民伍眾感泣相率立生祠徒節湖北劾省臣楚國公罪以聞上閱其有勞爲痛治其黨會阿合馬敗大遣使治官隱遼東宣慰使阿老瓦丁權黨也侵暴尤橫召公使遼至則封府庫究簿書審事察冤正魁惡著公道使還卽命長憲遼東公疾馳夜入詰旦莅事民權吏聘郡縣竦動初遼朔旱蝗公至雨澍蝗滅其境域烏桓白霽故地也民喜畜牧習射獵不事耕學公教以稼穡詩書居數年農理士奮民之孝者旌之不義而訟積年不決者訓睦之稔惡者懲艾之武平縣民劉義訟其嫂與其所私同殺其兄成縣尹丁欽以成尸無傷憂懣不食其妻韓問之欽告其故韓曰恐項顛有丁塗其跡

耳視之果然獄定上讞公召欽諦詢之欽因矜其妻之能公曰若妻處子邪日再醮令有司開其夫棺毒與成類并正其辜欽悸卒臺章以公詣平灤按總管劉捏古伯公至劉欲遁去公密令憲僚張仲威作漁人匿西城橋伺之劉果與吏徒會橋下謀拚其愆仲威得眞公一問皆伏胥吏之黠而虐扼民之吭而快其所欲而民莫敢校者率以罪黜平灤都吏張氏子尤狡而仗杖去之遠近震讐道行遵化風旋馬前公默謂之曰汝冤從我吾爲汝理至縣舍風卽見令縣以囊韉士從憲僚覬之信宿及蓊薈而風息得五尸皆短衣其一衣中得小印公下令居賈行商以端匹赴縣聽和市辨之賊果執遼粟歲輸灤陽使督運急時民方饑公曰吾忍視邪留粟振糶使不敢沮民賴以生遼人以公政通神明追思惠化立祠頌德入長刑曹讞獄與眾不合歸臥於家竟如

公言眾得罪公望益隆淮西不治復握使節申飭舊規
風采立變初宣饒徽數州有亂者官軍併俘齊民加以
劫掠絡繹不絕公責守令嚴津防峻訶譴民復其鄉者
數千餘家帥臣昂吉而闔淮殆三十年位中書右丞以
宣慰使操制兵民黨結中奧其子亦握兵煽虐奴官屬
轢風紀莫敢誰何宿盜數十出沒淮海陸梁自宋未有
制者宋亡帥葆芑其徒通納賄賂縱其所爲公遣健士
襲捕得所匿兵仗賞財定案市殉者七人自是帥漁鷺
狀百出公疏其跡取驛上聞帥鉅驛勿給公潛前走得
驛馳去帥遣兵校丁文虎追刺公至六河館不及公至
揚州文虎亦至誣公於行臺俄而六河館人以制公狀
聞文虎被執公赴覲制遣近侍阿朮治書侍御史萬僧
馳訊帥以罪廢已而赴闕以擅殺淮賊譖公不中憤而
斃淮境大寧丞相桑葛之黨虐平陽者尤劇其敗也用

公尹其府以清宿蠹詢父老得郡邑田里眞僞利病緩
急先後審行之民輯事理遼西吳氏子贖爲女巫行眩
眾事之若神人公洞其詐攝至府吏欲案究公曰亂常
之跡可侈言耶立命撲死眾股栗政空表廿四格化無阻
崇館宇引水置磴植柳代樵會斂爲紓眞定都會南北
驛傳雜沓事弊民表空字格痿大臣蠟眞奏牧守非公不
可表空字格遂尹眞定道壅治表空字格瘳生表空字格枯壯弱日聽
愬訟監隱破表空字格堅動無泥閔人人竦愜表空字格不充徵
脫眾走府治瞻判決優肆爲空表空字格初饋餼不充徵
需日困公以楮鑄貸民因母取息蕃表空字格畜孳豐廩
稍闢大賓館水磴創立如平陽用有餘裕表空字格宗親
之位謙從之區秩秩井井申諸路歲省官緡表空字格而下
不加擾憲人撫細故劾公中書敷奏事不涉私法可施
用宜著令式以示他州制可郡人集眾象龍祝雨公曰

無益令撤去迺慮獄囚底平允兩大需驛置新樂北阻

派

文表作派
誤下同

水使价車騎自南而北者雨溢夜瞑野次

無所建議徒置派南眾大便順築寺五臺督民運木奪
農壤眾令方急公不從府懼佐貳交諍之公曰吾民牧
也惟民是卹請待農隙朝省爲允樂城盜殺人取財夜
昇尸置民隆氏邸縣笞伏隆氏父及子二當死械囚送
府哭於庭尸毋辨賊無其子印識公疑之會使者決大
辟公給他賊承盜殺狀隆氏獄緩真盜遂獲黜吏退胥
之在民間者不啻百數劫持官府而肥其家哂其心則
禍之管庫稅廩之徒往往破產質妻鬻子以償所欲而
不敢與辯公劾農諸縣得其姓名杖死數人質鬻者還
之餘多遁去或改行爲善士其尹京也立誠信繩桀驚
挫強禦卹惇弱事至而斷豪右斂迹三河民藏古銅印
怨家訟曰將謀作亂縣榜掠其囚使符所訟至府辨其

文曰三河縣印公曰何亂之爲以不輸官罪之制令尙

廢芻稗以鹽易諸畿民霖溢害稼公請市旁郡戶部遽

令督責上下洵懼公帥京屬從部白省竟以公謀盜息

京甸京人弟假姊財不券姊嫠益貧弟賈益富姊嫠徵

財弟曰有券卽與姊憤愬聽者難之愬於公諭之曰汝

但歸俟徐誑劫盜扳弟對詰大懼吐實暨姊中分其貲

公果毅直諒立朝敢言操行清介忠孚信格有賜輒辭

上至引唐太宗賞魏徵故事曉之對曰臣言分也受賞

非分也竟不受持憲總郡皆有聲績以治盜文表上四
字空格

赴鄂民眾衛送不絕盜聞之戒其徒曰姚公正人也勿

犯性孝太君年踰大耋公拜參知政事甘肅難於輦養

辭不往世高其行搢紳推論聖朝人物骨鯁有爲終始

不貳其操者公當第一固確論也蓋嘗稽之鴻惟世皇

神鑑睿算長駕遠馭文武效能光輔丕業甸萬國冠百

王盛矣然廊廟岳牧邪慝閒出兜鮫三苗唐虞猶病於是
 是大植風紀明目達聰以弘至治公文表公上格當至元
 之際奮下列搏權奸莅方州滌巨蠹使辯捷不能措其
 喙仇憤無所憑其兇風槩氣節炳耀一世淵衷之所孚
 公論之所與豈徒然哉其忠義剛大蘊積有素故也公
 揚歷四十餘年功名事業磊礫赫奕侃訪輯遺軼既久
 始備因歎世有家者之子與孫或不侃若先烈湮滅可
 勝惜哉敘而銘之或有待也公始娶趙氏繼楊氏皆平
 陽郡夫人子男三人壽童蚤卒祖舜祕書著作郎卒侃
 內藏庫副楊夫人子也銘曰
 帝運開天中統至元人傑斯寶匪寶璵璠惟天聰明憲
 象執法元化宣朗昭融六合堂堂忠肅始峩鷹冠讜言
 正色英風夏寒虎炳其文山立殿陛構杙饗饗魄褫魂
 悸宸展凝邃上動天容庭有直臣庶倣其同有鑒其明

有玉其潔桓桓其勇夫夫其決孰撓斯曲孰鍊斯柔善
 善豈親惡惡豈仇雖千萬人莫沮吾往如脂如韋有泚
 其顙侯符三剖憲節六持義槩秋凜仁術春熙上亮其
 忠史載其信何勸不懷何懲不震碣石之北淮海之南
 社稷尸祝無怠其嚴滹沱溶溶霍岳峩峩其融其結百
 世不廟台鼎之崇芥視不屑京尹之雄莫仲與伯有烈
 終始無閒險夷誰近而忽益遠益思汾川西流河水東
 會稷山之銘惟以永配文類六十八
文表二十九
 參知政事王公神道碑
 至大元年汴梁路總管兼府尹王公年逾七十拜參知
 政事行尚書省雲南秩中奉大夫仁宗皇帝以公至元
 大德名臣拜昭文館大學士皆不果行延祐元年冬十
 二月七日薨汴私第春秋七十有九明年春三月十二
 日歸葬趙州益晉之金符鄉換馬里中書以臺疏列公

行績以聞贈通奉大夫河南江北等處行中書省參知政事護軍追封太原郡公諡憲穆元統元年冬其仲子承務郎萬億賦源庫提舉鈞以翰林待制蘇君天爵狀徵銘公碑狝汴諸生也其敢辭公諱忱字允中世居晉曾大考進晦彩不耀大考守忠金承信校尉考玉太祖皇帝威行中夏率郡民款附從太師國王木華黎用武有功累官定遠大將軍慶源軍節度副使夫人王氏生公剛毅正直讀經史不事空言能見之行事裕皇位儲宮取勳舊子孫入侍公被選忠恪小心十有餘年日慎一日或因事進說明諒不阿世祖皇帝察其能至元十七年拜山北遼東道提刑按察副使秩朝列大夫東藩諸王鷹人縱暴民大厭苦公繩以法遂避斂不敢犯宰相阿黑馬培克固寵希合之徒言利徼倖小吏耿熙告北京宣慰臣逋官緡若干萬既聞敕徵之熙懼失實

增益制敕逮繫百餘人公疏其妄熙獲罪裕皇賓天儲極虛位帝春秋高中外危之言者雖眾未見允可公建言陛下臨御多歷年所至元初預建太子天下歸心鶴馭上賓臣民憂懼惟早定大計以幸宗社章三上帝俞其言俄敕皇孫佩信寶撫軍朔幕大業迺定二十四年憲河南時南北既一無俚兇慝略民子女轉賣四方公謂此徒於聖天子仁覆天下之政梗害非常建請嚴立法禁從之遂著令甲息民江清占息民籍已再世矣兵豪狀愬帥府曰吾亡奴也卽馳騎數十殺清滅口取其妻孥貲產清子成逸出赴民有司愬之兵民文移往來數年不決穎兵朱喜始以避亂奴於人其主知其難於奴也集鄉胥里長同署券免之隸穎兵籍已久喜家火其故主子謂券已焚而復奴之喜持券出愬訟不決皆詣公愬之稽清占籍以歲壬寅其奴亡以甲辰喜券足

徵白之鎮南王府誣者皆屈明年兩訟之仇結近侍誣
奏公徇制下中書遣使收公案訊公疏臺請聞有旨馳
召入見敷陳盡底蘊帝大悅曰若人非素餐者敕省臺
讜慰還職近侍及使者皆以賕敗清喜數百口脫虎啣
繪公像事之二十七年置肅政廉訪司以新憲度明年
公副使燕南河閒鹽漕官守盜用賦緡十餘萬覈正其
辜諸王分地恩州其下以錢貸民加倍徵息公令子母
相當則止餘有罪先是以民大兵限私田四頃優其家
公曰國家取天下以來兵無~~盡~~歲今海內雖定征戍遠
方一兵歲費不啻十緡區區限畝豈易充裕在民編者
守令猶歲差富貧以均其力一入戎行永不可變請增
田額使無饑寒內顧之憂不報其後以兵力乏竭敕樞
密召公等會議以真定順德廣平等路俾之詢簡得富
民數百充兵兵之貧者遣還民伍人服其平公以舊臣

屢憲方州至是威名益振三十年拜廣西肅政廉訪使
秩嘉議臺檄以其廉能曉諸道疾不赴成宗皇帝卽位
元貞二年春使憲河東召見柳林撫慰優渥會并汾旱
饑請發粟振哺全活者眾五臺大建佛廬敕中書擇銳
事吏董役工部司程陸信驅民夫數千冒險伐木死虎
豹蛇虺者百有餘人其時皇太后幸其所公入言以寺
福民福未及而害已甚非初意也徽聽開悟減其役仍
賜卹死者家宗王分土并門廩餼歲取民間或不能供
輒立契約母息倍稱或不能償隸其子女民患苦之公
請出錢官贖還其親者百二十四人於是諸王膳貲歲
頒於官民瘼始蘇王嬖臣哈增不花怙威肆虐公按正
款伏王爲之請弗聽王馳使譖公上未信會駕北幸罪
人亡走愬公不法敕中丞崔或問之俄或卒駕還復愬
詔省憲雜訊之無驗愬者抵罪由是王禁戢藩僣民境

晏盩大德三年遷江陵路總管不行七年遷汴梁汴故
宋金都邑號難治公至省人憲人以公舊望不敢以府
屬視之政訟之難悉聽鑑裁下無隱情久之政清訟簡
吏民歌詠方宋包拯公莅汴之四年歲次丁未河決原
武注汴宋汴尤急吏士具舟楫以追漂溺民大懼公白
省請疏導順下勢家以田疇不利難之公曰吾守臣也
當任其責卽行河決壅以完城邑水息大築隄防羌族
礮手居鄆陵者萬餘室民役不預公督使趣工得萬人
不日隄成民至今思之公精明有斷不畏強禦所至興
學獎士修政新民不專法令威愛兼行爲世名德故姚
文公燧劉文靜公因與公游雅相敬尙蘇君公鄉人也
時賢言行優於志載其言曰世皇天縱有爲公及陳公
天祥程公思廉姚公天福皆骨鯁敢言視社稷民物利
害若疾痛嗜欲在己才猷風采凜震一世庸夫庸婦知

其姓字豈聲音笑貌爲哉天故生之以弼治效善論也
公夫人張氏封太原郡夫人子男二人曰銳曰鈞孫男
三人洙浩以胄子隸業成均淵幼銳鈞皆有學行鞏固
知之其諸孫爲胄子皆馴謹向學佳子弟也助教陳旅
云銘曰

世廟帝運鴻惟永年仁狹義洽德崇配天咨謂裕皇左
右前後侍衛僕從詢賢世胄時也憲穆宿衛青宮行必
循矩言必見忠涵育有年一靜一動帝曰良哉才可試
用卿貳東臬位四品秩碣石醫閭光昭化日來歸定省
遂莅河南上觸廷怒下讐狼貪帝曰忠哉斯豈尸位丞
相御史燕勞還轡皇鑑昭明飭新憲綱卿才而舊益礪
千將太行西東鴻河南北草木知名山川正色棲遲晚
暮尹汴四封宋陳許鄭春陽誕充偏側將迎於此大府
齒健而猶猶憚巨處上獲下順居五閱年華髮蕭蕭益

壯益堅其卷其舒大義終始鋼百其鍊骨柔繞指五握
憲節郡符再分洪波砥柱屹立不羣政預鈞輔逃矣其
道文崇祕館允也其毫之顯高朗之幽神明之地列岳
之天列星滹沱之郊邯鄲之鄙刻銘豐碑徵信惇史六十八 文表二十九

皇元故武略將軍濟南冠州萬戶府千夫長監末赤公

神道碑銘并序

聖朝統有天下制官以國人冠其上如古置監者然重
國體也兵名所部曰翼其監以北庭有武功者為之濟
南冠州新軍萬戶府千夫長劉清翼監將武略將軍末
赤以至大三年秋八月十有九日終南陽邾邑私第之
正寢享年七十有八於是公告老去軍蓋十有五年矣
既葬之明年其子蒙翰特暨其孫耐滿特狀公平生走
汴階其媼家子劉生汝止乞銘且言公之子孫再世能

讓蓋以公武足致位德足化家故也於是敘而銘之公
世出朔漠其族世曰耐滿氏考曰昔不察當天兵南墟
金社卒行閒公寄跡在軍都帥府即署公劄臘都鎮撫
屬副彈壓大兵伐宋從大將覘徹戰百丈山從萬夫長
治栗察破黃先洞至元十有一年從都帥鄭國忠宣公
破沙洋攻新城明年冬從大軍擣江淞破關隘帥府以
先後功狀彰聞分兵二百署職總把自是宋平十四年
春正月戡定閩中有功行中書省版以舊職仍移書樞
密奏授忠顯校尉職為真其年從忠宣公定嶺海薦升
職樞密奏加昭信校尉職仍舊帥府署公鎮撫仍將其
兵十八年十九年帥府及行中書薦以檄遣公領大將
別部幹略戰效益有聞二十有一年詔諸戰將定功以
聞用是樞密奏遷武略將軍佩金符監長千夫時二十
四年夏六月也其年從行省討交趾置副都鎮撫號召

指縱勇赴銳戰抵蠻都襲逋王嚴柵護集矢石兵無違
律省臣材之二十有五年歸駐鄂省以其功聞由是遷
監濟南冠州翼鎮戍湖南之桂陽元貞二年公以老疾
告其子和尙以承信校尉佩符繼職公姿雄拔性勁直
事萃於下情捍於上以理申白無少阿徇佚老鄉邑優
游以終嗚呼北庭將校之良也夫人笏都德明里察大
悲奴皆前卒今夫大蘇氏子男五曰寨臘曰馬僧夫人
笏都德出也曰和尙母夫人明里察義男曰蒙幹特曰
丑驢女三曰孛魯歡適百夫長吐臘曰完撫適冶先不
華曰拜葉真適百夫長錫臘男孫十曰耐滿特曰明安
達曰拓因曰掇烈孛特曰關奴曰完撫都曰孛羅曰藹
葉尺曰寶童曰壽童女孫十有一先是公請老子寨臘
當繼與其弟馬僧讓其季和尙和尙卒子幼寨臘子耐
滿特當襲又讓其弟明安達時公生存子孫交讓於當

年鄉人義之銘曰

元氣磅礴入荒同樞孰裂據之朔南一拘神人膺圖龍
見漠北聖聖迭作何判不一當至元初有事南方眾智
羣力雷砰電翔噓風喻雲霧廓煙闢運臂伸指無功不
集相時行間繫武略公雖職裨校克壯其戎歸老于家
教子教孫以禮以讓雍雍其敦稽公之生自始奮跡旣
昌其家又永其福悠悠汝汝紫雲東峩碑墓其阿百世
不磨文表二十九

河南行中書省護軍封南陽郡公韓公神道碑銘并序
皇元韓氏居保定之滿城繇行中書左丞今資政大夫
淮西江北道肅政廉蒞使之曾祖父中生贈禮部尙書
南陽郡侯瑞瑞生贈參知政事南陽郡公昌昌生資政
大夫公若愚四世百年至資政始大通顯資政公令其
子鑑鑄用延平李翬所載家乘徵銘其考郡公之碑資

政在中書其子倂仕翰林鑑鑄仕太常祝胄監翀皆有
官聯之素不敢以固陋讓敘封郡公字吉父燕故儒家
祖父治春秋左氏學隱德不曜卽資政公之曾祖父也
年益高目猶點漆詩書自怡外無所問資政生抱見之
隱君曰兒神骨異吾世積德是兒當興吾家惟寶衛之
壽口十有三尚書承訓義方有才行佐帥幕南征引疾
退處時令守未置鄉邑曲直輒赴愬曉悟化導鬪訟爲
息長幼敬服若眞守長卒遠近弔哭至皆慟用孫貴追
封南陽郡伯累贈至嘉議大夫禮部尚書上輕車都尉
爵郡侯妻李郡君夫人郡公尚書長子也材器弘邁金
亡天兵駐河南毫鄧置大鎮公方冠以軍事往來其間
文武將士推其能佐萬戶喬氏府挺正不阿一軍倚重
以尚書喪去終禫齒髮口壯遂不仕四弟稚幼教育均
至循序次成口口口口口滋衍畫宅五區分授生產

無閒嫡庶不私豪髮聞者稱歎資政仕於朝能浚明有
家遂清心事外令無關白年逾八十康強季父君玉儒
者有操行年旣九十亦精明公孝奉嚴恭雖寒暑左右
惟謹口口清淑幅巾藜杖雲山泉石父子昆弟游集燕
笑兩翁翛然厖眉皓髮春風顏頰歸路相將人望之若
僊然子益貴孫皆祿秩歲時觴慶拜舞鄉閭歆豔縉紳
頌嘉謂罕倫比至大三年封南陽郡伯延祐二年八月
九日薨壽八十有六五年爵郡侯泰定三年贈中奉大
夫河南行中書參知政事護軍追爵郡公公和易不峻
崖岸少長與語喜津津見眉睫貴賤皆得輸其情赴人
急恐緩然天性清慎動有程法人莫測也世或論口金
將武仙之變戰鬪燕趙闕往往邑無留居野無遺噍滿
城兵衝也公之家族繩繩秩秩繼守詩禮不有陰隲其
能然列室李君南陽郡夫人男子一卽資政公也室同

里張氏累封至南陽郡君夫人女子四適石翟崔馬四
族翟氏夫以潯州判官早卒夫終婦節壽七十令旌其
里居男孫五俶國史典籍卒鑑通事舍人鑄太常太祝
錫鐸胄學生女孫二壻張思敏長百夫卒何德謙知安
肅州曾孫男三孟源孟潛孟浩曾孫女十資政公字希
賢穎悟力學既冠口口口書宥密卿士才之始立武衛
爲衛史轉留守史督開闢運以功賞錦衣一襲授從士
郎擢都事入掾中書留守段公以其職務方殷必公可
濟請口口佐留銓俄升經歷秩承務口進奉政大夫知
薊州都事中書左司遷刑部郎中秩奉議轉諸路寶鈔
都提舉秩朝散仁廟卽阼轉吏部郎中御史臺都事遷
刑部侍郎秩中順郎中中書左司秩中憲屢與丞相諍
辯可否相銜之遇事羅織傾危上聞而惡之退罷丞相
用公參議中書首相復擅威虐眾諂附公中立不私曲

見驚害上知其罔不悅相以罪斥宣旨以公爲尙書公
在憂中終制起爲戶部尙書秩亞中復參議都省秩太
中公以口口省口引口口口口口上陟遐所斥相得位
修理舊憾公危不測賴帝不從得免猶奏收制敕除名
至治三年冬詔雪冤列公數人夫告天下驛使送制敕
卽其家還之徵拜刑部尙書秩正議至拜湖廣行中書
參知政事賜燕省堂留爲詹事丞復使宣撫江浙留遷
侍御使口口口紀踰年使憲浙西秩資政公性英果勁正恥輒
書左丞秩資善分憲淮西秩資政公性英果勁正恥輒
熟臨事坦白志盡公道佐理中書以直見挫忠讜上達
帝眷簡注光暉益增仁廟謂公廉且寬平事得中制迎
覲龍虎臺賜坐雍容再易時暑詔公行酒上御所進觴
已舉醕爵前公問曰向者老賊虐汝以何事對曰吏部
尙書缺堂議擇人左相謂參議王善夫可臣曰然首相

怒曰以口上曰使刑部定讞之何罪語已酒方授至以
 字呼而不名故海內知其賢而壯其節嘗試推之韓氏
 之慶隱士君深其源郡公父子繼其流資政公忠孝君
 親著其盛而遠其傳國有良臣家有能子可尚也已銘
 曰
 空壑雨集巨浸稽天晴日告旭疾焦目前維泉在山赴
 河達海源深流長天莫之改韓世繼美始曰無聞原原
 其來自隱士君尚書其承父父子子化其鄉鄰恭讓斯
 起衍衍郡公終親之喪銖芬曰昌孝慈不忘有弟四人
 羈卯齟孺教之育之義煦恩嫗至有家室思順其成五
 居式序均厚其生于于雍雍長長幼幼口口流光域此
 仁壽子仕中朝崇厲臣節門閥赫然日光玉潔穹碑在
 東郎山在西如此銘辭世世不迷 拓本 碑在滿城
 贈同知陝州飛騎尉追封洛陽縣男楊君世慶碑銘序

楊氏家弘農者皆東漢太尉震之胤曹今僉江南淞西
 道肅政廉訪司事彬字文質世居陝號峭澗之鄉蓋舊
 族也遠祖曰能生六男子宋政和間世葬祖塋之南曰
 謙子男二人曰和曰紀和生元吉有文學不仕大觀三
 年世葬祖塋之西墳志猶可詢考金源之季兵燹散徙
 其行有四郎者以童幼葺澗池故業居之積粟能施壽
 八十終娶張氏即文質之曾祖考也生子曰松曰善兄
 弟自其父時皆富農殖至元定戶版松籍兵善籍驛松
 生林樾麓善生興潤温溥其家益大三世七房林生杉
 椿彬樾生楫材樸楸麓生叢楚鬱興生顯進旺潤生淑
 温生淳溥生潔四世才有六房杉生士勳士熊椿生士
 熙士然彬子其兄杉之子士點楫生士煦材生士煜叢
 生士炳士煒楚生士炯鬱生士燧士燧善之曾孫六名
 未序松性純樸喜怒不形治家有法田穀充廩年饑半

價振糶雖鄰邑飢孳霑蘇活壽七十有三娶閭氏嚴而有節壽七十長子林謹厚孝睦力本善藝壽六十有一用子貴累贈承直郎河南府判官奉直大夫知陝州飛騎尉追封洛陽縣男娶師氏端靜節儉能相其夫壽七十有五累贈恭人洛陽縣君文質明敏勁果能自奮起厯史參府刑曹掾樞密掌兵選審禮制別姓族息妄訟襲職者無憾官長才之遂掾中書會司天管句訟日官葬卜犯重忌逮訊久不決敕集賢翰林太史臣等赴省集議定擬擯黜十有二人掾持說堅正中理皆得出繫禁還舊職聲聞益彰由是主事工曹都事樞府以工部員外郎拜監察御史經歷樞院郎中禮曹判官宣徽同知兩淮都轉運事改司丞內宰遂憲淝西郎秩自承直至承德大夫秩自奉直奉政朝列至朝散徵其猷爲戚晚安役之匠不得售其私工署之言行教坊欺肆之

臣不得逞其暴禮闈之職舉南省鎮戍不苟變動遵至元之廟算東藩脅從不盡廢斥靖天^麻之人心惜爵品勸立功明法守懲妄覲樞幕之畫著建郊祀之配饗攻執法之貪邪繩職官之賄通豸府之名立宗親之贄太官之資玉食之需不可幸庖臣之賜宣徽之體正持憲江淞審獄察冤方見施措以族葬卜期請告還洛徵銘世瑩余旣美其能忠職分於朝廷又見^靈其祖考於窀窆也遂爲之銘曰

弘農楊氏本自有周伯僑宗裔斯出楊侯關西夫子太尉瓜瓞連世上公載厚芳烈今茲澗池號略山川族葬不徙千有餘年或土或農有顯有晦及我皇元涵育士類東都舊域挺此遺苗裕後旣永稽前孔昭諸孫濟美振起肅政崇念悠遠冠雀鱣慶才行英卓能子能臣以功報國以名報親河洛峭函弘農郡縣鄉黨斯榮宗族

用勸嵩室之北砥柱之南銘示來葉貞珉用鏡拓本
池南

菊潭集卷三
真定路宣聖廟碑
初鎮州置真定路以中山冀晉趙深蠡府一州五土地
人民奉我睿宗仁聖景襄皇帝顯懿莊聖皇后湯沐首
務立學養士當是時也世祖聖德神功文武皇帝淵潛
朔庭聞鎮之學緩未即敘龍集于未赦有司勿怠其事
於是以金粟岡廟址崇殿廡闢賢舍太原元好問有記
越十有四年庚申世皇即祚都燕統一八表置憲肅郡
府鎮憲為諸道之冠庠序闕略必憲人府人胥議興治
至元暨今雖屢加葺猶有未備至順辛未憲暨府議倡
集楮幣三萬市物傭工募役自殿之廡自廡之門新其
屋楹三十有二棟宇軒楯拱挾環合左右翔峙作杏壇
於殿之北神廚於廟之東自廟徂學門垣棊栝循序森

菊潭集卷三

真定路宣聖廟碑

初鎮州置真定路以中山冀晉趙深蠡府一州五土地
人民奉我睿宗仁聖景襄皇帝顯懿莊聖皇后湯沐首
務立學養士當是時也世祖聖德神功文武皇帝淵潛
朔庭聞鎮之學緩未即敘龍集于未赦有司勿怠其事
於是以金粟岡廟址崇殿廡闢賢舍太原元好問有記
越十有四年庚申世皇即祚都燕統一八表置憲肅郡
府鎮憲為諸道之冠庠序闕略必憲人府人胥議興治
至元暨今雖屢加葺猶有未備至順辛未憲暨府議倡
集楮幣三萬市物傭工募役自殿之廡自廡之門新其
屋楹三十有二棟宇軒楯拱挾環合左右翔峙作杏壇
於殿之北神廚於廟之東自廟徂學門垣棊栝循序森

立瓦墁締築堅麗於舊先是府尹馬思忽已基未構而去政人遷易者十餘年尹張猛合倅和則平治中和允升繼至憲使妥歡提其綱賓佐韓復理其目始克有濟其年夏告成壬申春府遣吏李明善介徵士瞻思狀來請志其績翀嘗貳憲燕南不容讓稽宋蔡京遷學陸佃記略曰真定雖塞北有江南之勝江南豪傑起如臨川王公與孟軻相上下真定初未有聞噫是何言之怪也真定者冀州東垣堯舊封也昔帝堯以帝嚳子侯恆山之唐自唐侯卽天子位徙山之西號陶唐氏太行東西境數千里皆帝之圻真定固神明之宅也孔子經法於易則遡伏羲以本無言書則始唐虞以道政事詩則采殷周以正性情春秋則黜五霸以嚴名分禮樂升降以鑑窪窪天人之道至矣迺曰惟天爲大惟堯則之唐韓愈謂堯以道傳舜禹湯文武周公孔子孟軻蓋孔氏立

教如帝典微言如三謨帝堯孔子位不同而同聖王安石背道迷經蒙君誤國京佃傾黨滋熾世益大壞河南程氏兄弟承先聖之緒揀之終賴其言道不墜地建安朱氏師則兩程哀輯遺言貫通折衷以悟百世先正許文正公見其書神感明會相我世皇同符堯舜世道人心翕然大正洙泗淵源日月昭朗今神聖繼興世日趨治鎮股肱郡也帝堯之思在焉朝廷之化先焉崇事先聖所以教也鎮士知所嚮往下學上達尊經慎藝何德不進何業不修何邪不鑑何古不及憲牧之輔治教縉紳之報君父於是乎在迺賦詩以慰鎮人士曰
太行之山滹沱之水孰古與美陶唐之里滹沱之滸太行之所孰今與伍皇祖之土恆山嶙嶙滹水泐泐昊天生民思堯之仁滹水湯湯恆山蒼蒼帝堯相望於赫世皇始鎮之府時未忘武維士與女澤沐時雨龍德出潛

萬方既瞻春熙秋嚴自北而南皇風斯扇時雍於變視
彼侯甸恆鎮之先大殿周廡先聖之宇久未今覩誰敢
予侮有廟有庭有戶有扇肅肅其凝昭昭其靈新是鎮
學式對恆嶽惟土也確順我先覺求門於牆求室於堂
伊洛考亭使我不盲惟聖之玄惟王之素園冠方履天
地之度侃侃閭閻天天申申如目之詢如躬之親既儼
既翼臨汝明德以賓皇國方州是則鎮人聚喜歸功憲
紀憲人曰止其誰敢爾願望神京稽首奉揚配天無疆
天子之光文表三十一 文類十九 拓本

湖州路安定書院夫子燕居堂銘

皇朝書院

今上皇帝鑑舊制誥萬方優儒蠲役仁其家元統三
年湖州安定書院山長張蔚以夫子燕居故室陋陋率
儒眾鳩工徒徙基而北堂隆序拱增壯曩昔恆廩不預
推羨置禾畝六十有三蔚言宋淳祐五年湖守蔡節始
闢書院創屋楹四百七十置米畝二千先聖之室侍以
顏曾安定之祠傳習之館皆循矩矱九峯蔡氏紀其績
雙峯饒氏主其教道化大行至元二十三年祠院鄰寺
勢奪權徙游氏魚樂亭三十年守許師可卽北城觀德
坊市屋五十餘楹院始定今燕室加崇子適至敢請記
以白悠遠翀聞宋天章閣待制安定先生胡文昭公瑗
先王之舊其教卓然有造士風天下宗之英才育焉與
泰山孫明復徂徠石守道皆有師道學者稱曰三先生
程明道兄弟之所傳雖自濂溪來伊川游太學聞三先
生之教遂厭科舉知其傳之正也先生家泰州望安定
教湖學久卒葬烏程今郡縣書院猶古黨術之庠序也
學者報本必祀先聖先師聖尊而師親師必鄉賢於泰
於湖皆築書院泰先生父母之鄉湖其桐鄉歟翀嘗忝

位辟雍蔚國子生也既為序之敢附雅頌明聖朝之治

正越國之風辭曰維山有松可斲可度維水有藻可采可芼由宮而門由

堂而室柱礎桓二邊豆秩二瞻仰玄聖申二天二顏說

曾唯天朗日昭繼是孰先孫思鄒孟以俟後覺其傳者

正安定生世千古寥二濬導洙泗于霄于蒼貞我皇元

覆幬持載教澤四充滋益光大太湖之府安吉之鄉流

風餘韻古今洋二司正氏蔚鼓舞士眾義順事宜崇此

梁棟才以資世學以育才繩二繼二用鑑靈臺兩浙金石志

安氏尊經堂銘

明明尊經安氏堂之用有儆惕予其銘之於在古昔挺

起神聖越紹上帝昭我明命暨蒼姬氏四術迺崇詩書

禮樂順古範銘文武道衰四教崩弛孰其救之天縱夫

子龍馬獻圖用著蓍策吉凶悔吝開我人則二禪三繼

曰帝曰王典謨訓誥明我天常志欲有言形於詠歌雅

頌得所神人以和王綱失維列侯遞霸其敢僭踰筆討
無赦是謂四府其用不窮大禮大樂升降汙隆宇宙有
經終古莫忒民無能名功載人極鼎鼎儒者相與守之
孰吾堯桀相與培之曾子思孟荀董王韓周程張朱以
達聖元不息不泯皇衷民彝其有能奮立百世師安氏
東垣世以儒名味道之醇服義之精百氏諛聞益不有
當處宜下陳經無二上至小無內至大無外晦不加蹙
顯不加泰風雨震凌旃幪是屋六籍鳳峙疇匪雌伏安
父之嗣伯仲叔季穉子齠孫繩繩繼繼豈徒藏之斯務
明之豈徒尊之斯務勤之其徒之賢蘇伯修甫將以所
聞往相告語多歧亡羊克敬克念無或怠墮請以銘鑑

知許州劉侯民愛碑

文表三十
文類十七

至大元年秋奉直大夫許守劉侯既終更矣郡摺紳先生田浦城劉興國及舊家望族郡人之父兄長者謀劓侯字民之政於石屬筆小子翀懇讓不獲敢蹟侯行事誤次之大德龍集乙巳夏六月侯下車家政斬然闐無雜謁其在猷為苟有利民無或不舉許北趾於汴南揖淮楚素號多事侯材識精敏百務叢劇聲容舒徐刃嬰而解吏無稽牘獄無梏訟不尙苛猛而凜不可犯自公而優入則杜門端晏游泳典籍出則賓禮先覺隆獎學校三時既隙則帥郡屬叩校官請益經史親為之倡繇是郡政翕然侯澤物仁而有方耕鑿樹畜求底實效及終三年諸軍藪牧外巳陵原隰墾闢殆盡初郊農貿穀市僧連郡豪微羅外關擅輕重以售孃弱胥困乃立斗斛市距州治重脅羅翔價之法趨者如歸羅雖升合以上無敢摧衄民農兩利之侯以事出法漸弛復襲舊至

杖大駟數人法復立民頌歌之歲丙午河南諸郡饑流瘠日至春穀價勃湧首發私庾大縮價聽民羅募富民粟數萬鱗出糶市慮羅有不均也於諸社責其長日閱數賦與之夏雨戕麥得請出郡廩積年鼠耗鑿米薄價舒民春夏徂秋無凋瘵者明年薦饑羸孳狼戾請省出公縉振之民為蘇中統抵大德凡所立有司法程討閱簿書彙帙戾實而據守不踰故勇於拯民而善禦其害省大核屯田臨穎鄧艾口民稻田三百頃人有說省曰此古屯也可復築之下侯按實之侯按至元中司農研水利拓民業隆平生息之道也業此率三四十一年暴取之民措何地省不遑以兵民恫疾之狀迭陳不可卒止宣徽歲遣使征羊馬法三十取一至則肆虐取人莫誰何度其至令縣民大書其法於堊壁患遂止程約五縣繇賦齊均凡出錢於縣官市物民聞曰和買民產所有

猶未易供無之則估百倍賦官郡縣苦督責無敢拒貪肆者亦陰幸漁獵雖瘡痍其民不恤侯深患之土有均賦之苟無之抗簡覆陳不允不止鄢陵扶溝產紅藍粹不時買萬鉅時其地年歉而藍霧民大驚蹙省以侯敏幹略趣買之相其故力請罷之是不獨仁於許又有以仁其鄰也省檄論囚荆南時荆楚大水民饑歸請撤禁山澤以活危墊省移中書如請民濟於阨是其澤不獨囿於近又有以及其遠也其聽訟明察而果哀矜惻怛未始不行其閒襄城南距湛河與葉交壤葉民之鹽取解池齊鹽止襄舊樹石河之南與鑄以畫鹽之法葉令妄徙而北侵襄民近百家嗾漕屬以其法酷穿之兩縣飛狀鬪辯葉引陝漕合攻襄中以危法時侯偕省使者會決之卒以理摧葉復石舊疆民底_(益)河南先民疏土曠田價至弱雖有質鬻而契券闊略鹵莽逮今民日生

集叢藜灌莽盡化膏沃價倍十百鬪鬪滋熾豸吏蠹法孔穴芴出至有絲曠歲時而莫之決者侯既清白復詳聽覽而洞情偽佑是懲非至未半歲決以百數訟爲衰民葛英女嫁而奔人英蹟之獲他婦憚嚴其舅姑而私竄外者寘家令妻教增族事如其女返魂他屍者歸壻不納一男子果爭之訟不決侯行縣詰之情立出民有以計誣罪其同行者訟縣醉亡楮緡千獄逮人數十訊不白屢愬州至據州地以慟覘色詐立屈之決囚南陽主婦告奴酖其夫三日死榜楚極慘毒下獄久不立侯讞曰實有毒立死無少緩者簡乎獄供有冤立貰之其聽決多此類也舊水旱禱祠桑門羽流雜巫覡囂喧無益一不取齊被精壹以走羣望靈貺昭答嘗春旱禱八龍井明日雨大作民有擁香拜舞治所者人旣德侯侯善使人而知所務長社尉解僻遠爲創築近郡治使與

庫傳犴犴相連峙微循捍衛弭患無形三皇肇立民極
今天下通祠而舊郡祠陋不構新之崇葺廟學植檜柏
六十四本築室藏書購愬王體先賢貌影自濂溪及紫
陽朱子像而祠於學故實凡相交承則帥案屬厚贖禮
去者於侯又最豐終讓卻之始終銖髮無取及是人益
信在政（註）嶽牧風紀屢倚用之軋強鋤暴在人所不
敢為侯不憚也將退政之日其下讐伏如甫至談者偉
異之名聲藉藉上游諸公多譽藉之交剡騰薦不一二
數士論俾奉法恤民有古良二千石之風知言者是之
侯名天孚字裕民家大名以國書生從事中書出判東
平移漕司擢知冠州遂遷許風岸嶄立氣度凝遠春秋
方強摠用未既加忠孝豈弟出天稟能以學濟之淵乎
莫測也浦城名九疇興國名庭瑞皆仕焉而已者聲實
素著郡人望所推先郡既不忍弭忘侯德兩公倡帥之

人彌咨歎其公云聊既敘其詳乃最而詩之庸翼郡人
寥邈之思辭曰

郡侯繩繩三歲逆旅孰莫我矜侯吾父母我饑我寒我
燠我哺鳴柚於家田墾在野繫我窘躓均恫其身膏以
雨澤煦以陽春惟古立學定民之命治有本末禮樂刑
政誰廢棄之謂能其官我侯至止德馨如蘭士蒙（註）
侯教載之搢紳煌煌侯勞來之孰匪人哉而玩侯法將
雍芟之我用是愨善達而施天下之兼（註）獨吾私一郡
是淹車聲麟麟民莫侯攬有堅其珉鑄配琬（註）鼎鼎其
來疇允侯蹟跂予望之其永無極（註）表三十七
鎮平縣尹劉侯遺愛之銘

今至元三年歲次丁丑冬鎮平縣尹劉侯代去校官朱
秉誠耆舊楊仲賢梁國英士李昌祖等來曰侯以元統
二年冬涖縣審荒蕪課耕墾稅丁戶均差徭察事情靖

囂闕獎士類隆風化集流散遂生養嚴法令弭偷剽始
至決訟百餘皆當愬日稀簿甲不紊里社耕學日修補
邏日謹穴剽日戢三皇宣聖廟庶敝圯俎豆諸生廢弛
者日修舉遂暇無事他所赴愬憲部府廷者用侯推決
剖析無滯農書刻布民社曉耕植繭穀果蔬歲日增常
平義倉之儲歲日裕墾田歲日廣貰戶歲日眾憲暨府
皆剡薦廉約清畏自始及代無私謁眾日信將刻石永
思以示不忘敢請予曰吾故人也知其才惠政如此其
可辭侯名益謙字恭甫潁州太和人以斬黃府史入憲
自淮荆三道掌書除萬億寶源提控案牘擢河南行省
理問所知事秩將仕郎選充本省掾史尹縣棗陽秩承
事郎尹是縣剛毅明果奉公忘私其天性然也因撫所
聞系以詩其辭曰

縣互宛境跨帶穰邑大山盤互源泉悍急鎮曰陽館民

牧且耕金季置縣始號鎮平聖朝開濟分布諸侯之此
遙署襄府樊州中統至元遷易守令稽考事宜始復縣
政令長相因六七十年豈無惠愛留此郊廓誰如劉侯
慎終如始清己仁民懷古君子今其去矣日月有恆旣
挽莫及而借莫能斯琢貞珉刻頌嘉績庶幾見聞追慕
無極

文表三十

河南淮北蒙古軍都萬戶府增修公廨碑銘

昔光祿大夫江西行省平章政事贈金紫光祿大夫司
徒上柱國鄭國忠宣公推忠開武協運佐治功臣奧魯
赤統蒙古軍四萬戶佐帝平宋開闢洛陽縣龍門山之
南伊水之東以治軍政至其子嗣都萬戶脫完不花始
構治宇以肅官寮今其孫嗣都萬戶察罕鐵穆爾偕其
副都萬戶昔置伯吉謀曰舊治陜隘弊腐宜撤新之始
其地廣袤十畝因增倍於先治事之廳退息之堂賓佐

之幘幪廉使之床庇簿書之度閤財物之庫庖廚門
闔譙樓隸舍至四十楹壯麗崇深名其堂前曰仁武後
曰忠益樓曰嚴更遣千戶咬住暨忽都帖木兒馳狀徵
記劄臘爾氏自行省鐵木台麥烈忠宣公奧魯赤銀青
榮祿大夫上柱國湖廣等處行中書省左丞相脫完不
花贈守忠翊正濟美寅德功臣資德大夫河南江北等
處行中書省右丞相同知行樞密院事普答刺吉贈保
忠經武致德宣忠功臣上護軍夷山郡公五世六襲及
今都萬戶自懷遠大將軍加昭勇年三十有旭申氏自
博魯溫諾延行省兵馬都元帥塔察而蒙古軍四萬戶
別里即台橫州屯田萬戶府達魯花赤輕車都尉平陽
郡侯密察而都元帥兼江東西大都督宋都台鎮國上
將軍江西道都元帥阿魯輝輔國上將軍江西道都元
帥副都萬戶平陽郡襄懋公伯里閭不花六世八襲及

今副都萬戶自懷遠大將軍歷定遠加昭毅年三十有
九昭勇昭毅皆蒙古貴族世胄其祖與宗自太祖聖武
皇帝來繼忠勇靖朔漠開西域伐金伐宋一海寓著勞
績今兩都萬戶協心力輯軍眾居則恪官守動則整戎
行善於紀律斯可見矣乃序其事銘其堂所之碑曰
皇元受命震起天北風雲龍虎感會奮激羽翼爪牙交
濟其功分守方嶽帥總元戎河淮都侯峙闡崇洛兩帥
鉅宗光世其爵統四大府兵政霜嚴節制涖止宜蒞其
瞻斧斤山林梁棟柱礎以挺以植隆闢帥宇仁里斯美
擇必處仁志在仁武熊羆化馴優游清暇退集燕室延
訪賓友志廣忠益煌煌聖朝武緯文經崇堂邃奧式永
攸（盛）翰林侍講學士中奉大夫知制誥同修國史孛朮
魯獅譔文表三十

大元奉元明道宮修建碑銘并序

老子生殷亳社苦縣厲鄉曲仁里距縣東不半舍九龍井在焉崇事宮廟歷代相因憲宗皇帝四年龍集甲寅故太師汝南忠武張王闡毫得太清明道兩宮遺址兵燼悉爲荒墟以文之燕請事修復長春嗣教眞常大眞人李宗師遣隱眞大師提點石志玉通微大師知宮李志祕綜其務歲丙辰誠明眞人張宗師奏請崇道眞人張尊師棲雲眞人王尊師主其宮制無幾何棲雲蛻化其門人輩亦皆協力崇道則始終不懈未踰一紀締構宏麗允惟明道故宮以河渦混匯圯溺迨乎石李三公相繼爲眞人結廬墾田充益歲廩事修治疏河流入北門繇是窪下澱而窪漫漶涸而燥至元壬辰棲神眞人陳志微以陳道潤張道淵楊道和等率眾除荒實塹陶甃峙材準基定位以陳志和李道堅等協襄事功達之長春^玄逸眞人張宗師用道潤提舉宮事大德己亥棟

宇克完百度鮮整棲眞眞人李志本薦道潤志和道堅等陞提點今凝元眞人馬道逸飭舊圖新日益充大謂宜立石鑱銘示永久元統元年特進神仙掌教凝和眞人苗宗師召太清提點趙道眞來京道潤志和等因馬介趙屬筆於翀昔也馬眞人乘傳北迴嘗識於衛趙君用是倦倦遂不終讓序曰隋名苦縣曰仙源唐曰眞源宮曰紫極追上老子^玄元皇帝以本帝系築宮縣隅東北備嗣皇帝駕次之齊居榜曰奉元天寶二載易紫極爲太清宋加太土老君混元上德皇帝名縣衛眞眞宗兩謁太清壇奉元之陰東鄉祝拜易宮額曰明道金仍其制錫良田豐祝事鴻惟太祖聖武皇帝奉天威君六合天寤宸聰使車馳召長春^巳仙翁崑崙之山歷數年踰萬里覲遐朔推道餘沃淵衷拯生靈仁萬有其功大矣老子亳宮之方葺也世祖皇帝潛藩下教令卽位

距穰西百里而遠有山曰靈堂古麻衣子棲真之跡在焉學道者狀其事云子出沒晉宋閒今餘千年其閒或有因其跡而繕宮室玄道法者皆軼不紀今大易道人毛守朴齟荆棘侈土木一新之慨然曰仙聖之跡失今不錄將遂顛絕千載之下不有能筆孰開厥靈奉狀摯翽委筆焉徵狀麻衣姓李氏名和字順甫後際神人更志康字惠和自號麻衣子貞觀閒封惠慈廣德普濟真人真人世居秦父思溫西靈令以穆帝昇平元年春二月十有五日生真人而紺髮美姿膂力絕等然性明慧好經史契悟玄要而綽有才譽孝武太元九年時年二十有八喟然太息曰吾年如此猶湛穢腥腐愚亦至矣以學道之志告親請去西靈君責留之不爲止君曰吾爲汝築別室聽汝所欲爲何如不答陰入祈口坐一巖閒彌月人不知君偕親黨求之遂窅入結廬居之西靈

君迹見曰吾老矣職則汝襲無苦爾爲也不答令親黨偪之不起嘗獨行終南逢一道者藜杖芒屨狀貌龐古猗阜危坐謂真人曰吾久汝候矣揖與語皆道祕也由是神悟劃然道者授以祕訣戒曰終南非汝宅也南陽之閒湍水之陽直乾之方有山靈堂石峒其旁神開汝鄉汝則往之當有異人率眾拜汝汝慎拊之可以翁神功於蒼茫問姓名道者曰吾左玄太極也言訖不見真人神其言往求靈堂於湍陽者久之莫曉所在道遇樵者相與問答所自來及所欲往樵者欣然導至峒門問何居曰此山俄頃化去乃益喜自是坐峒十有九年時安帝義熙十年夏大旱居民張爽約眾計曰麻衣子有道者也盍往叩之眾諾相率詣峒焚香置水於前禱之真人初坐瞑目頃之顧曰何爲者眾以早請讓卻之眾日且暮請不輟真人苦拒者亦累日將夕有少年十許

輩前請曰人日紛紛何也真人語以其故少年請但許之真人託以昧妄不敢諸少年復堅請真人怪諾之翌日如諾雨果大至霽還行山閒見十有二人睡山陰熟睇之皆負龍狀心異之還峒而十二人至皆稽顙曰吾屬龍也所居之溪曰巫峽曰五雲曰岷山曰清遠曰桐柏曰播塚曰崑崙曰武陵曰苕羅曰滌溪曰浣沙曰澠池上帝以師道業有成敕令輔師行化耳真人稽首帝居而推峒居龍別占一穴龍自峒入雲霧晦冥雷電交作抉裂山背各潰一穴而去真人後游鄖鄉歷宋孝武大明元年真人行年一百有一矣秋八月八日白鶴翔集祥飆霽雲蔚_(進)扶獲真人儼坐而逝鄖人卽其地築觀名以白鶴仙墳存焉唐貞觀十三年天子制表山曰石門靈堂峰曰顯聖峒曰勝泉龍皆封公曰廣潤洪潤咸潤慈潤靈潤施潤崇潤豐潤應潤愍潤顯潤保潤封

真人曰惠慈廣德普濟真人旌宮曰普濟果爾則太宗以邁往之君首勅大業賜神號於宇內而於麻衣子之所宮褒奉殊特則靈堂道區古勝地也自後泯不可稽豈山川之運自有盛衰道自有汗隆人之爲事者或成或否學道者或斷或續操著述之任者或工或拙或足以傳或不足傳而至然耶皆無由知之今守朴挺然自奮於千載溼圯之餘追麻衣子之道於蒼莽寥落之際而振襟之平居則有水泉之利充極則膏澤之請一方之民將神明其所爲十二溪之神物將集靈異於_(玄)漠惟吾所令苟幽明順指人神效績則推而達之清朝貞觀之衰有不必取榮異代者翀嘗聞希夷子受道於麻衣道者豈度世不死百世以下遨游人閒邪不然將兩麻衣邪或度世不死滅沒六合徊翔故_(臣)拊守朴之跡而歎其精心苦力能紹其業也如此則守朴之籍丹臺

上玉室也將有日矣於是敘其事而銘之石銘曰
警虜真人挺跡有家咀道之腴土苴世華神人指迷太
華培塿靈堂崔巍上列牛斗惟龍駢駢滅沒有無乃奉
帝旨為吾卒徒窟宅八荒呼吸自我滂澤四施孰往不
可悠悠山雲鶴逝千載民之神之功猶不宰曰惟守朴
跡遠心同華觀峰出轉替以隆泉流泓泓以漑以灌鬱
充以請曾不我捍有黔其首厥奔走之神眇莫覲守朴
其師蒼^珍穹窿而刻斯語出英桓桓斥護終古^{文表}

菊潭集卷三

菊潭集卷四

元史列傳

李朮魯翀字子翬其先隆安人金泰和閒定女直姓氏
屬望廣平祖德從憲宗南征因家鄧之順陽以功封南
陽郡侯父居謙用翀貴封南陽郡公初居謙辟掾江西
以家自隨生翀贛江舟中釜鳴者三人以為異翀稍長
即勤學父歿家事漸落翀不恤而為學益力乃自順陽
復往江西從新喻蕭克翁學克翁宋參政燧之四世孫
也隱居不仕學行為州里所敬嘗夜夢大鳥止其所居
翼覆軒外舉家驚異出視之冲天而去明日翀至翀始
名思温字伯和克翁為易今名字以夢故後復從京兆
蕭灝游其學益宏以肆翰林學士承旨姚燧以書抵灝
曰燧見人多矣學問文章無足與子翬比倫者於是灝

以女妻之大德十一年用薦者授襄陽縣儒學教諭陞
汴梁路儒學正會修世皇實錄燧首以翀薦至大四年
授翰林國史院編修官延祐三年擢河東道廉訪司經
厯遷陝西行臺監察御史振濟吐蕃多所建白五年拜
監察御史時英皇未出閣翀言宜擇正人以輔導帝嘉
納之尋劾奏中書參議元明善帝初怒不納明日乃命
改明善他官而傳旨慰諭翀巡按遼陽有旨給以弓矢
環刀後因爲定制還往淮東覈憲司官聲跡淮東憲臣
惟尙刑多置獄具翀曰國家所以立風紀蓋將肅清天
下初不尙刑也取其獄具焚之時有旨凡以吏進者例
降二等從七品以上不得用翀言特舉未立人才多以
吏進若一概屈抑恐未足盡天下持平之議請吏進者
宜止於五品許之因著爲令除右司都事時相鐵木迭
兒專事刑戮以復私憾翀因避去頃之擢翰林修撰又

改左司都事於是拜住爲左相使人勞翀曰今規模已
定不同往日宜早至也翀強爲起會國子監隸中書俾
翀兼領之先是陝西有變府縣之官多望冒者翀白丞
相曰此輩皆脅從非同情者乃悉加銓敘帝方獵柳林
駐故東平王安童碑所因戲駐蹕頌皆稱旨命坐賜飲
尙尊從幸上京次龍虎臺拜住命翀傳旨中書翀領之
行數步還曰命翀傳否拜住歎曰眞謹飭人也聞謂翀
曰爾可作宰相否翀對曰宰相固不敢當然所學者宰
相事也夫爲宰相者必福德才量四者皆備乃足當耳
拜住大悅以酒觴翀曰非公不聞此言迎駕至行在所
翀入見帝賜之坐陞右司員外郎奉旨預修大元通制
書成翀爲之序泰定元年遷國子司業明年出爲河南
行省左右司郎中丞相曰吾得賢佐矣翀曰世祖立國
成憲具在慎守足矣譬若乘舟非一人之力所能運也

翀乃開墾除弊省務爲之一新三年擢燕南河北道廉訪使晉州達魯花赤有罪就逮而奉使宣撫以印帖徵之欲緩其事翀發其姦奉使因遁去入僉大常禮儀院事盜竊太廟神主翀言各室宜增設都監員內外嚴置局鎖晝巡夜警永爲定制從之又纂修太常集禮書成而未上有旨命翀兼經筵官文宗之入也大臣問以典故翀所建白近漢文故事眾皆是之文宗嘗字呼子翬而不名命翀與平章政事溫罕等十餘人商論大事旦夕備顧問宿直東廡下文宗虛大位以俟明宗翀極言大兄遠在朔漠北兵有阻神器不可久虛宜攝位以俟其至文宗納其言及文宗親祀天地社稷宗廟翀爲禮儀使詳記行禮節文於笏遇至尊不敢直書必識以兩圈帝偶取笏視曰此爲皇帝字乎因大笑以笏還翀竣事上天曆大慶詩三章帝命藏之奎章閣擢陝西漢中

道廉訪使會立太禧院除僉太禧宗禋院兼祇承神御殿事詔遣使趣之還迎駕至龍虎臺帝問子翬來何緩太禧院使阿榮對曰翀體豐肥不任乘馬從水道來是以緩耳太禧臣日聚禁中以便顧問帝嘗問阿榮曰子翬飲食何如對曰與眾人同又問談論如何曰翀所言義理之言也從幸上都嘗奉敕撰碑文稱旨帝曰候朕還大都當還汝潤筆賞也遷集賢直學士兼國子祭酒諸生素已望翀至是私相歡賀翀以古者教育有業退必有居舊制弟子員初入學以羊贄所貳之品與羊等翀曰與其饜口腹孰若爲吾黨燥溼寒暑之虞乎命樽集之得錢二萬緡有奇作居四區以居學者諸生積分有六年未及釋褐者翀至皆使就試而官之帝師至京師有旨朝臣一品以下皆乘白馬郊迎大臣俯伏進觴帝師不爲動惟翀舉觴立進曰帝師釋迦之徒天下僧

人師也余孔子之徒天下儒人師也請各不為禮帝師
笑而起舉觴卒飲眾為之慄然文宗崩皇太后聽政命
別不花塔失海牙阿兒思蘭馬祖常史顯夫及翀六人
商論國政翀以大位不可久虛請嗣君即位早正宸極
以幸天不帝既即位大臣以為赦不可頻行翀曰今上
以聖子神孫入繼大統當新天下耳目今不赦豈可收
怨於新造之君乎皇太后以為當從翀言議乃定遷禮
部尚書階中憲大夫有大官妻無子而妾有子者其妻
以田盡入於僧寺其子訟之翀召其妻詰之曰汝為人
妻不以資產遺其子他日何面目見汝夫於地下卒反
其田元統二年除江浙行省參知政事以遷葬故歸鄉
里明年召拜翰林侍講學士以疾辭不上至元四年卒
年六十贈通奉大夫陝西行省參知政事護軍追封南
陽郡公諡文靖翀狀貌魁梧不妄言笑其為學一本於

性命道德而記問宏博異言僻語無不淹貫文章簡奧
典雅深合古法用是天下學者仰為表儀其居國學者
久論者謂自許衡之後能以師道自任者惟耶律有尙
及翀而已有文集六十卷子遠字朋道以翀廕調祕書
郎轉襄陽縣尹須次居南陽賊起遠以忠義自奮傾財
募丁壯得千餘人與賊拒戰俄而賊大至遠被害死遠
妻雷為賊所執賊欲妻之乃詆賊曰我魯參政家婦縣
令嫡妻夫死不貳肯從汝狗彘以偷生乎賊醜其言將
辱之雷號哭大罵不從乃見殺舉家皆被害
元故中奉大夫江浙行中書省參知政事追封南陽郡
公諡文靖字亦魯公神道碑銘并序 蘇天爵
公姓字亦魯氏諱翀字子輩年出二十號稱鉅儒由憲
府薦授襄城學官汴省右丞廉公恂辟掾辭擢汴學正
朝廷聞其名召為國史院編修官未幾御史臺辟掾又

辭臺臣高之奏爲河東道廉訪司經歷遷陝西行臺御史階將仕佐郎入拜監察御史延祐五年擢中書右司都事會權相用事公退居濟之新鎮改翰林修撰鄆忠獻王柏柱爲相復薦公左司都事轉從仕郎尋陞右司員外郎泰定初充會試考官遷國子司業歲餘除河南行省左右司郎中遷燕南道廉訪副使入僉太常禮儀院事尋陞奉訓大夫兼經筵官至順元年同知禮部貢舉拜漢中道廉訪使久之僉太禧宗禋院事兼祇承神御殿事改集賢直學兼國子祭酒應召赴上都議事又兼經筵官進中順大夫禮部尙書元統二年進中奉大夫拜江浙行省參知政事以葬親北歸復號至元元年召拜翰林侍講學士知制誥同修國史以未葬辭明年復命編修官成遵召之而疾不能行矣公之先女眞貴族泰和中章宗命定氏族爲百字尤魯氏其一望著廣

平公會祖阿納尼金符離令妣石抹氏祖德國初官忠顯校尉南京路漢軍總把累贈昭勇大將軍前衛親軍都指揮使上輕軍都尉追封南陽郡侯妣南陽郡夫人成氏考居謙累贈中奉大夫河南行省參知政事護軍追封南陽郡公妣南陽郡夫人王氏公世居上京之隆安昭勇公初從憲廟南徙以保甲射生壯總軍抱戍鄧之順陽川因家焉初至元己卯郡公從故相賈公居貞掾江西宣闡公生贛江舟中於時釜鳴家人驚異昭勇愛公穎悟嘗曰是兒必興吾家稍長讀書一覽卽記郡公以順陽僻左徙居於鄧貞隱李先生鄧名士也公從學詩賦同門莫及郡公卒家益貧窶進修愈力翰林閣宏曰觀子之才後必名世曷遠遊以廣見聞公往江西謁克齋蕭君某蕭君故宋大家夜夢大鳥集所居屋翼覆院外疾出視之冲天而去釐明公至蕭君異之公始

名思温字伯和爲製今名及字歸復走京兆拜集賢蕭
貞敏公貞敏隱終南爲學精勤夜以繼晷公寓其傍僧
舍攻苦食淡人不能堪公裕如也歸復遊漢上從翰林
姚文公學古文公奇之以書抵貞隱曰子輩談論鋒出
其踐履一以仁義爲準文意不待師傳而能後進無是
倫比於是貞隱以女妻公公之爲學務博而約自六經
諸史傳注下至天文地理聲音曆律水利算數皆考其
說聽其言論滾滾不窮故聲聞大振自官汴學士之從
者日眾及師成均與鄧公文原虞公集謝公端爲同時
教人不倦發明經旨援引訓說累數百言極於至當而
後已學者恐不卒得聞故經公指授者多知名公佐河
東或訟冀監郡不法其憲長曰監郡貴胄宜詳讞之
蓋欲緩其事公曰我第知有憲法焉知爲貴胄乎卒正
其罪關陝有警郡民驚惶蒙古萬戶提兵赴河中道出

翼監公白憲長曰是郡要衛當留兵鎮守萬戶難之公
曰有責在吾不汝累也郡賴以安應州大興土木之工
公言兵後宜蘇民力朝廷爲罷其役土番之民以饑來
告天子憐憫命出內帑錢振之公以西臺御史承命而
往民賴其惠及遷內臺適英王初正儲位公言當選正
人朝夕輔導制可公分行淮東體察憲人能否准憲尙
嚴刑庭列獄具甚眾公曰國家置風紀本以肅清貪污
興行治化初不專尙刑也取獄具焚之南陽設六屯田
各樹官屬脔削其民民不能堪故多流亡公請罷去官
屬俾有司董其佃作公在省闈左相鄆忠獻王以公端
重博洽甚加敬禮王嘗謂公曰汝能作宰相否公對曰
宰相之位固不敢當然平昔所學皆宰相事蓋聞有福
德才量者乃能爲之因爲王陳其說王曰微公我不聞
是言權相旣死王進右相君臣親密無閒慨然欲復祖

宗之治上畋易州聞王之曾祖魯忠獻王安童賜田賜碑在邇乃往觀焉敕設燕享王稱觴獻壽上大悅明日公進駐驛頌敷言忠獻王轉相世廟統一六合修舉百度治底雍熙以箴規焉上覽之命以駐驛表其里英皇崩王亦遇害逆黨列據津要公移疾不出晉邸遣使誅其逆黨公卽起視事泰定閒數有天變地震水旱之異時相多西域人西域富商以異石爲寶誑取國帑又其私人多以貪墨奪官吏弗克敘用皆有怨言故致災變若此天子信之因肆大赦播告多方蓋彼內以私結黨與外以取悅於奸貪公時爲燕南憲副力陳其不可他憲雖亦有言皆依違護不若公言明白剴切已而事果不行公讞囚保定河閒民犯私鹽法當運司治罪公以民罹饑寒誤觸刑禁皆隨事治之佐吏以爲難公弗恤也囚有在獄久不決者公察其情可杖杖之可釋釋之

眾皆以爲平允岐山周公廟道士據之公曰周孔名教炳如日月豈宜列于異端請設書院令學官主之文宗入京首設太廟旣卽位又行祫饗大禮公攝禮儀使咫尺天顏上有所問執禮以對上悅上建太禧宗禋院崇奉祖宗神御若家人禮又建奎章閣學士院陳列圖書日覽觀焉兩院官屬學士皆上所自擇勳舊文學親書其姓名付中書以行文書銓曹不敢進擬公旣選太禧而奎章偶闕大學士員近臣乘閒以某官爲言上怒曰汝何不薦魯子翬馬伯庸而以斯人爲言乎公之見知類如此武宗廟室未有配位大臣請用並附之文公曰宣慈惠聖皇后昔受寶冊母儀天下禮當合食于廟其後卒從公議今上卽位議者以比年恩澤太頻不宜肆赦公曰皇上以聖子神孫入繼大統當令臣民視聽一新不可斂怨于國遂赦天下賜公白金百兩金綺二端

楮幣萬緡初國子生以入學名次爲先後歲貢補官殊無勸懲故太史齊公履謙爲司業請以學業爲陞齋等第以積分公試文詞優者爲中選由是諸生咸思奮勵而人才興矣後值天_曆多故其法中輟公爲祭酒治試諸生於崇文閣下中選者凡若干人先時學官多僦民舍以居監有隙地在居賢里公曰古者教有業退有居乃積弟子入學贄禮得楮緡二萬有奇爲宅數區築室完美以居師生帝師至自西方輒百官郊迎公卿膜拜進觴師坐受之公立以觴進曰師釋迦徒天下僧之師也余孔子徒天下士之師也師笑而起舉觴卒飲觀者凜然時相將封秦王事下禮部議公曰秦大國也非宗王不可今丞相食邑高郵高郵驛名秦淮非秦地也宜以淮易之眾伺相意不悅因共請曰詔已命封于秦不當別議有官平章者卒其妻盡以田施僧寺云爲平章

祈福妾子求訴于公其妻曰平章名爵子蔭足矣所施家貲幾何公曰汝旣無嗣而反蕩其家資異日何顏見汝夫于地下命以田還其子廷議是之江浙地大事劇而省臣煩苛事多壅積民以爲病公曰職居大藩而欲吹毛求疵居下者無所措手足矣事至卽決民大稱頌公爲文章嚴重質實不爲浮靡其詞悉本諸經如米粟布帛皆有補於世教有菊潭集六十卷大常典禮因革不同每遇禘享輒稽吏牘故多牴牾公請于朝賜筆劄廩膳倡禮官彙集爲書七十五卷公欲於順陽建博山書院以淑其人分置六齋曰治理治事經學史學書學數學方經營之而疾已革遺言喪祭一本于禮勿事夷鬼以至元四年三月某甲子薨于順陽味經堂享年六十訃聞制贈通奉大夫陝西行省參知政事護軍追封南陽郡公諡文靖是歲四月庚寅葬鄧之永昌鄉西樊

里四望山下配李氏貞隱先生之女儼雅儉勤治家有法親供蠶績而無富貴之習累封南陽郡夫人以至正元年五月某甲子卒于順陽稼穡堂享年五十有三歲閏五月甲申合葬公墓子男曰遠力學有聞今祕書監祕書郎嗚呼士之于世也愿謹者人多以為迂倜儻者人則以為狂砥勵名號者反以為矜通達時變者或以為譎甚矣為士之難也公學識卓異不隨流俗俯仰論議設施多有可述而淺見狹聞者或未能盡識也然士之特立獨行豈以求合時好為賢乎臨川吳文正公嘗曰李尤魯公學博而正獨立無朋聞者以為知言銘曰

金有中原治安百年設為貢舉網羅才賢聖元方隆遺士接踵臺閣彬彬尚賴其用故老寢亡惟公挺生淵淵其蓄涵涵而停江漢之閒河華之右爰有碩師為世領袖公從問學堅苦不渝華聞日昭衣冠偉如洙泗遺經伊洛訓傳講說精深義理融貫踐敬臺閣畫贊相臣言論之卓風動縉紳翌翌成均公正師席敷教以寬多士作則中朝典禮外省自宣有倫有要惟經惟權士之立朝貴有學識議事以制匪學何式瞻彼東土金人筆與既定危亂遂登治平文物聿彰人材斯出惟公之先喜事儒術積善儲慶益大以振公學有源力相斯文繼世克承箕裘是業表公儒行允配前哲

虞文集

子翬僉院畫象贊

篤信聖賢之要力求經傳之遺屹乎山嶽之峙粲乎日星之垂端居兮憂世之侃侃致用兮儼然而有思絜豈梯之君子庶人文兮在茲

右菊潭集元字尤魯翀撰魯翀字子翬鄧之順陽人官至翰林侍講學士卒贈通奉大夫陝西行省參知

政事護軍追封南陽郡公諡文靖事蹟具元史本傳
 狎狀貌魁梧不妄言笑其為學受蕭貞敏齋姚文公
 燧之傳一本於性命道德而記問宏博異言僻語無
 不淹貫文章簡奧典雅深合古法天下學者仰為表
 儀所著菊潭集六十卷文淵閣書目已不著錄足見
 明初已佚明劉昌中州名賢文表內有狎文二卷亦
 刺取文類及金石碑版而成未見全集也今又采得
 文四詩七以益之訪碑錄載有襄城學記大興尹題
 名記重修香城院記均未見錄元史列傳蘇天爵撰
 神道碑虞集撰畫象贊附焉光緒乙未七月繆荃孫
 跋

菊潭集卷四

共字三萬一千五百七十一箇

